

Postal Regn No. MZR/51/2024-2026 || RNI Regn 45448/86

FEBRUARY 2026

Vol. 115 No. 5 • A man - kum khatah ₹50

Kristian Tlangau

CHHUAH JAN KUM - OCTOBER 1911



THUHRETU ATANA KOH

- *Lal Isua a lo kal thuai dawn* • Rinna
- *Lehkhabu tha chhiar pawimawhna* • *Tlai ngai lo Isua a tlai*

Editorial • Mizoram Synod • Lâwrkhâwm • Zawhna leh Chhâna

Kum 115-na

February 2026

Bu 1,361-na

Editor : Rev. P.B. Zosâphara
Joint Editors : Rev. Dr K. Lallâwmzuala
Rinsailovi
Rev. Dr F. Pachhûnga
Upa Dr R. Malsâwma
Circulation Manager : Râllianthangi
Synod Office Second Floor
Mission Vêng, Aizâwl - 796 001

Office Phone: 6909132893 |email: kristiantlangau1911@gmail.com

Kum khat lâk man : ₹50 Bu khat man : ₹5

A man pe duh leh a bu la duh chuan Circulation Manager,
Synod Office Second Floor, Mission Vêng, Aizâwl hriattîr tûr a ni.

Thu chhuahte hi Editor ngaih dân a ni vek kher lo.

A CHHUNGA THU AWMTE

1. Editorial	1
2. Mizoram Synod	2
3. Lâwrkhâwm	13
4. Zawhna leh Chhânna	15
5. Sermon	
(1)Thuhretu atâna koh	17
(2)Lal Isua a lo kal thuai dân	21
(3)Rinna	23
6. Article	
(1) Lekhhabu ðha chhiar pawimawhna	25
(2)Tlai ngai lo Isua a tlai	29
(3)Mizote hi Israel-te hnêna Chanchin ðha hril tûr kan ni em?	31
7. Sûnna	33

SYNOD PUIPATE

Moderator : Rev. John Râldosanga
Secretaries : Rev. B. Zohmangaiha (Sr)
Upa C. Lalduhawma (Jr)
Finance Officers : Rev. Dr K. Lallâwmzuala
Rev. Vânlalzuata
Statistician : Rev. Lalsangmuana
Sr Executive Secretary : Rev. V.L. Luaia Hrànhleh
Executive Secretary : Rev. Dr Rosiamliana Tochwawng

The Organ of the Presbyterian Church, Mizoram



RILRU INHAWNG

Editorial *Kristian Tlângau chhiartu zawng zawngte Lalpa Isua Krista hmingin chibai ka bûk leh a che u.*

Mihring kan khawsak hona hrim hrimah hian rilru inhawng taka kan awm hi a ÷l khawp mai. Rilru kan inhawn leh hawn loh hian kan khawsak honaah kawngro thui tak a su ÷hîn. Kum tîr a la ni a, khawtlâng leh kohhran pawhin kan hma zâwnah hma thar kan la leh dâwn a ni a. Kawng hrang hranga kan chêtnaah rilru inhawng taka kan tih a ÷l leh dâwn a ni.

Kohhranah chuan Sunday School leh Nilai leh Beihruah thupuite kan zir leh dâwn a. Hêng kan zir tûrah hian rilru inhawng tak chung a kan zir a ngai dâwn a ni. Rilru inhawng vak lova kan zir chuan tute emaw bei deuh leh tute emaw ÷an bîk deuh tein kan hmu mai dâwn a. Rilru inhawng tak chung a kan zir erawh chuan kan ram, khawtlâng leh mahni tân hlâwkna kan hmuchhuak ngei ang.

Khawtlângah pawh a ni leh dâwn a ni. Hruaituten ram leh khawtlâng tâna ÷ha tûr an han ngaihtuah leh ang a, rilru inhawng lo tân chuan, “Mahni ham÷hatna chauh an ngaihtuah. Ram an hmangaih lo,” tih a awl ang. Rilru inhawng tak pu chung a thil thlîrtu chuan, “Hei chu a ÷ha ang. Tuar rih mah ila, kan ram, khawtlâng leh kan tân hian a la ÷ha dâwn a ni,” tiin, a êng zâwngin thil a thlîr thiam thung dâwn a ni.

Kum tîr a÷ang hian Kristian rilru dik tak puin, rilru inhawng takin hun i hmang ang u.

.....



– *Executive Secretary
i/c Publicity, etc.*

✪ SYNOD OFFICE HAWNG

January ni 7 khân kumin atân Synod Office hawn ãan a ni a. Hemi ni hian Rev. John Râldo-sânga, Synod Moderator-in devotion kaihruaiin thuchah a sawi a; inhlan tharna hun hmangin, ãawngãai rual a ni bawk. Moderator chuan hun vawng dik tûr te, mi dangte lâwm thiam tûr te leh thianghlimna kawnga ãan la thar tûr tein thawktute a fuih a ni. Hemi ni hian Synod Office-a awm thar tûr mi 9 hmêlhriattîma leh lawmna hun hman nghâl a ni a, Synod Office-a thawktu awmna siam remten charge an inhlan fel nghâl bawk.

✪ PASTORAL MINISTRY THUPI

Synod 2025 chuan kumina Pastoral Ministry thupui atân ‘**Thlarau leh tih tak zeta Pathian biak**’ (Jn 4:24) tih a thlang.

✪ EXECUTIVE SECRETARY- TE HNA SIAM REM

Synod 2024 Gen 36-nain kum khat hnu a en nawn tûra thu a dah angin, Synod 2025 Gen 41-na chuan Synod Executive Secretary (2025–2027)-te hna chanpual hetiang hian a siam rem:

Rev. V.L. Luaia Hrânleh, Senior Executive Secretary – Pastoral, Finance, General Administration, Theological Education, Pension & Provident Fund, Service Board, Nupa Thu, Administrative Areas, Synod Trust, Revival, Archives, Endowment Fund leh tûl dangte.

Rev. Dr K. Lallâwmzuala, Executive Secretary – MSSU, PRESCOM, Hospital, SL&PB, Kohran Hmeichhia, Hmangaihna In, Hmeichhe Hostel, FG&CC, Campus Ministry, Social Front, Research & Evaluation Wing.

Rev. Dr Rosiamliana Tochwawng, Executive Secretary – Ramthar, Education, Worship, KÏP, Synod Information & Publicity, Presbyterian Bible School, Synod Prison Ministry, Partnership, SMTC, Mizoram Christian College, Zirlai Viltu.

✪ SYNOD INKHAWMPUI 2025

December ni 5–15, 2025 khân Synod Inkhâwmpui chu Dâwꞑpui Pastor Bialin Zârkawt Kohhran Biak Inah tuang takin an thleng a. Moderator chu Rev. John Râldosânga a ni a. Thlarau lam thupui, ‘Chhuan tûr dik’ (Gal 6:14) tih chu Rev. Dr H. Vânlalruata, Chanmari Pastor Bial vawngtuin a sawi.

Tûn tumah hian Pastor atân mi 20 nemnggeh an ni a. An zîngah hian Dr Rinchâmliana, Pune chu kum khat Pro. Pastor hna a thawh hnuah a bik taka nemnggeh a ni. Pro. Pastor atân mi 19 lâk thar an ni baw. Pastor Bial thar pasarih – Salem Vêng Bial, Falkland Bial, Champhai Zotlâng Bial, Dolchhora Bial, Koreng Bial, Ranchi Bial leh Masihi Sangati Sêrchhîp Bialte hawn a ni a. Nepal Mission Field chhûnga Tarahara Bial station chu Salakpur-ah sawnin, bial hming pawh Salakpur Pastor Bial tia thlâk a ni a. Odisha Mission Field chhûnga Adava Pastor Bial thuthmun chu Duringuda-ah sawn a ni a, Duringuda Pastor Bial tia hming thlâk a ni baw.

Bangalore North Mizo Presbyterian Kohhran chu bial thuthmun atân pawm a ni baw. Tin, Suarhliap Biala Kananthar Kohhran chu Saikhawthlîr Bialah behtîr a ni baw.

Synod Inkhâwmpuia hian palai 2,207-ten ro an rêl a. Rorêl langêsâr zual han târ lang ila.

1. India rama sakhaw zalênna a awm theih nâna hma lâk chungchâng chu SEC bawh zui tûrin dah a ni.
2. SL&PB lehkhahu chhuah, a thlâwna Board member-te hnêna pêk thîn chu tihtâwp tûra rêl a ni.
3. Pastor Biala Masihi Sangati leh Pastoral Ministry thawh ho dân mumal zâwk siam rem tih a ni a, SEC bawh zui tûra dah a ni.
4. Hnathawh uar tûr leh taima tûra inzirtîr rem tih a ni a. Synod Social Front-in tual-chhûng kohhrante hma lâkna tûr a siam ang.
5. Chanchin Ṭha Thlen Ni tûn aia urhsûn leh uar zâwka hman dân tûr ruahmanna siam tûrin SEC ruat a ni.
6. Synod huapa inkhâwm ngaih pawimawh inzirtîr rem tih a ni a, SEC bawh zui tûra dah a ni.
7. Pathian thu chhiar nâna Bible hman tam inzirtîr rem tih a ni a. Kohhran tinah hriattîrna thawn chhuah a ni ang.
8. Synod Hospital tân tui tam zâwk neih theih dân kawng zawn rem tih a ni a. SEC kutah dah a ni.
9. SMTC tihchangtlun rem tih a ni a. SEC bawh zui tûra dah a ni.

10. Research & Evaluation Wing kalhmang tihdanglam rem tih a ni a. Hman nghâl tûrin SEC-in ruahmanna a siam ang.

11. Synod Music School tihlen rem tih a ni a, SEC-in a kawng a zawng ang.

12. Aizâwl pâwn aţanga Synod hnuai trainer leh campaigner ruat ve rawtna chu, a theih chin chinah tihhlawhtlin tum ni se, tih a ni.

13. Kohhran Pavalai Pâwl, Fellowship puitlinga hlân kai rawtna chu rem tih a ni a. SEC-in thil tûl lo bawh zui se, KPP Inkaihhraina chu Synod-ah rawn thlen leh rawh se, tih a ni.

14. India ram pâwna Mizo awmte enkawl dân kawng zawn tha tih a ni a. SEC-in ruahmanna siamin Synod-ah rawn thlen leh rawh se, tih a ni.

15. Indiana Mizo Presbyterian Kohhran enkawltu tûr pastor dah chu tha tih a ni a. SEC-in fimkhur takin lo kalpui rawh se, tih a ni.

16. Kohhran Upa mahnia intihlum, Presbytery Inkhâwmpuia sûnna hun hman chu, a tha e, tih a ni.

17. Sawrkâr ngen angin Jordan Centre, Sethâwn chu lâk rem tih a ni a. Bawh zui ngai chu SEC bawh zui tûra dah a ni.

18. Sawrkârin a pawm theih tûra kohhranin form kan neih tihdanglam rem tih a ni a. SEC bawh zui tûra dah a ni.

19. Pension Dân 2024 VIII:D(2) en that rem tih a ni a. SEC-in hman nghâl tûrin a lo en tha ang.

20. Masihi Sangati Kendra-a thawktu fate medical re-imburement (MR) pêk chu a tha tih a ni a. January 2026 aţanga hman tûra pawm a ni.

21. Synod Hospital tâna lung lam enkawlna, Cath Lab lei chungchâng chu, SEC-in a tihpuitlin dân kawng lo zawng rawh se, tih a ni.

22. Synod Partnership Committee Inkaihhraina Dân en that rem tih a ni a, SEC bawh zui tûrin dah a ni.

23. Synod Hospital dinhmun en thatna leh zir chianna hi a theih ang anga tihlawhtling tûrin Synod Hospital Board-in hma lo la rawh se, tih a ni.

24. Ramthar Commission din rem tih a ni a. SEC-in lo bawh zuiin Synod-ah rawn thlen leh rawh se, tih a ni.

25. MCC-a D.El.Ed. leh B.Ed. zima hawn chungchâng chu, SEC-in a tûl anga lo zir chiangin hma lo la rawh se, tih a ni.

26. Synod Sum Vawn Dân 2020 chu en that rem tih a ni a. SEC-in lo bawh zuiin Synod-ah rawn thlen leh rawh se, tih a ni.

27. Kum 2026–2027 Synod Budget-ah ₹5,43,31,53,000 hmuh tum a ni a, hman tum chu ₹6,07,31,53,000 a ni. Jordan Centre, Sethâwn pualin chêng nuai 200 dah a ni bawh.

Inchhiarna tlangpui hetiang a ni:

Presbytery zât	48
Pastor Bial zât	310
Kohhran zât	1,185
Kohhran member zât	6,46,891
Mitthi zât	4,421
Nau piang zât	7,647

✪ PASTORAL

◆ Pastor/Pro. Pastor Induction

Induction hun : January ni 11, 2026 (Pathianni) chawhnu

<i>Sl.No.</i>	<i>Hming</i>	<i>Awmna tûr</i>
1	Rev. Dr C. Lalramchhana	Ramhlun
2	Rev. R.C. Lalnghâkliana	Dâwrpui
3	Rev. J.H. Zaikima	Mission Vêng
4	Rev. R. Lalhmangaiha	Armed Vêng
5	Rev. Dr Lalchawimawia	Bethlehem Vênglai
6	Rev. F. Lalchuanawma	Chhînga Vêng
7	Rev. Lalrinawma	Ramthar Vêng
8	Rev. Dr H. Lalrinthanga	Vaivakâwn
9	Rev. H.S. Remmawia	Kulikâwn
10	Rev. Samuel Lalrinsânga	Bûngkâwn
11	Rev. K. Lalfakzuala	Himali
12	Rev. Lalzawmliana	Salem Vêng, Aizâwl (Bial thar)
13	Rev. R.T. Lianthanga	Leitan
14	Rev. Lalremruata	Sakawrtuichhûn
15	Rev. Lalduhawma Râlte	Thuampui
16	Rev. K. Zonunsânga	Falkland Vêng, Aizâwl (Bial thar)
17	Rev. P.C. Lalrinchhuanga	Lunglêng-I
18	Rev. R.C. Lalthavula	Sihphîr
19	Rev. Billy Lalrinchhana	Sêrchhîp Vêngchung
20	Rev. John B. Hmar	Sairâng
21	Rev. G.S. Ropianga	Sairâng Dinthar
22	Rev. H.L. Thianghliima	Lunglei Chanmari
23	Rev. Thanhnûna	Lunglei Vênglai
24	Rev. Lalchhandama	East Lungdâr
25	Rev. Laldinpuia Hranleh	Saitual Chhim Vêng
26	Rev. F. Lianthangpuia	Khawhai North
27	Rev. Zairemtluanga	Champhai Zotlâng (Bial thar)
28	Rev. Lalnunthara	Mamit Hmunsâm
29	Rev. Isaka	Tlungvêl
30	Rev. Jayanta Marak	Dhaka, Jharkhand
31	Rev. Vânlalzuala	Tato, Arunachal North
32	Rev. Albert Lalnunzâma	Badu, Kolkata
33	Rev. K. Lalchunglûra	Hortoki
34	Rev. Zonunsânga	Hnahthial
35	Rev. Lalrinmawia Hmâr	Damparêngpui
36	Rev. P. Laltlanhlua	Khawlailung
37	Rev. Matsam Bo	Bomdila, Arunachal West
38	Rev. Joel Lianrinzuala	Zaite, Cachar

39	Rev. C. Lalnuntluanga	Phainuam
40	Rev. Lal̄thazuala	Phûdungsei
41	Rev. R. Zahmingliana	Hmunth̄a
42	Rev. F. Lalpiantluanga	Chawngtlai
43	Rev. Jerry R. Lalrinkima	North Delhi
44	Rev. R. Lalramliana	Koreng, Arunachal North (Bial thar)
45	Rev. Deep Chand	Etawah/Tameri, Lucknow

◆ Installation neihpuite

<i>Sl.No.</i>	<i>Hming</i>	<i>Awmna t̄ur</i>
1	Rev. Lalbiakchh̄unga Pachuau	Director, Synod Rescue Home
2	Rev. C. Lalduhawma	Principal, PBS
3	Rev. Pusham Rekhung	Lit. Worker, Field Office, Aru. East
4	Rev. Lalremliana	Chaplain, Civil Hospital
5	Rev. Chinmoy Purkayastha	Lit. Worker, A/S Office, Barak Area
6	Rev. H. Lalzuiliana	FG&CC, Champhai (Champhai Vêngthlangah installation neih a ni)
7	Rev. Lalrammawia	Chaplain, Synod Hospital
8	Rev. T. Lal̄thafamkima	FG&CC, Kolasib (Hm̄ar Vêng Kohhranah installation neih a ni)
9	Rev. Jerome Lalchhuanga	Field Secretary, Assam Mission Field
10	Rev. Daniel Lalmalsâwma Sailo	ATC (History)
11	Rev. Lalzidinga	FG&CC, Lunglei (Bazar Vêng Kohhranah installation neih a ni)
12	Rev. Johny Lalremfela	Director, Campus Ministry
13	Rev. Tanyo Pabin	Field Office, Aru. North
14	Rev. C. Lalrinliana	Chaplain, ZMC (ZMC Chapel-ah)
15	Rev. Nirmal Kumar Limbu	Hindi Bible School, Bâwngkâwn
16	Rev. Dr David Lalrina	ATC (Missiology)

NOTE : Installation neih chungchâng hi SEC 313:5 App. 1 of Dt. 25–27 June, 2025-in a lo pawm tawh anga ruahmanna siam a ni. FG&CC-a awm t̄urte hi Pathiannah installation neih a ni a; Chaplain leh office-a awm t̄urte erawh hi chu Pathiannah ni lovin, hun dangah installation neih a ni.

◆ Minister thawk lai awmna hmun siam remte

<i>Sl.No.</i>	<i>Hming</i>	<i>Awmna t̄ur</i>
1	Rev. H. Lalawmpuia	Electric Vêng, Aizâwl
2	Rev. Lalêngz̄ika	Zuangtui
3	Rev. Lalthanh̄awla	Zêmbâwk
4	Rev. K. Lalêngmawia	Nursery Vêng, Aizâwl
5	Rev. Munsî Hembrom	Ranchi (Bial thar)
6	Rev. Lalduhsaka	Buarpui
7	Rev. Lalnuntluanga Sailo	Dârlâwn Vêngghlun

8	Rev. Lalhangvunga	Boleng, Aru. North
9	Rev. Lalsiamtluanga	Sialhâwk
10	Rev. Malakia Lalnunfela	Tualchêng
11	Rev. Lalhunthara	Kolkata (Mizo)
12	Rev. K. Vânlalthanga	Suarhliap
13	Rev. Lalrinawma	Patna North
14	Rev. J. Lalremruata	Hailakandi, Barak
15	Rev. Lalchhuanliana	Dolchhora (Bial thar)
16	Rev. Lalthangliana Tochwawng	Saipûm
17	Rev. S.T. Lala	Ṭawipui North II

◆ **Nemngheh tharte awmna tûr**

<i>Sl.No.</i>	<i>Hming</i>	<i>Awmna tûr</i>
1	Rev. R. Lalengkima	Pailapool, Barak
2	Rev. Lalrinchhana Pachuau	Kabuganj
3	Rev. R. Lallâwmawma	Khasan, Aru. East
4	Rev. C. Lalnunluanga	Miao, Aru. East
5	Rev. C. Lalremruata	Thrizino, Aru. West
6	Rev. C. Zokûnga	Jugicherra
7	Rev. C. Lalnunkima	Gilakuta, Odisha
8	Rev. Chungnunglûra	Thaidawr
9	Rev. Jonathan Lalruatkima	Pakur, Jharkhand
10	Rev. Emmanuel V. Lalhmingawia	Daporijo, Aru. N

Synod Mission Board

11	Rev. R. Lalthansiamia	Udharbond, Barak
12	Rev. Zosângliana Pachuau	Dehradun, Delhi

Field Worker

13	Rev. Vishnu Kumar	Khagaria, Patna
14	Rev. Rosilal Soren	Amrapara, Jharkhand
15	Rev. Susan Syangbo	Pokhara, Nepal
16	Rev. Mrinmoy Mondal	Bagha, Barak
17	Rev. Shivam Singh	Lucknow S, Lucknow E & Raebareilly

◆ **Pro. Pastor thawk lai awmna hmun siam rem**

<i>Sl.No.</i>	<i>Hming</i>	<i>Awmna tûr</i>
1	P/P Vikash Kumar Ram	Ara, Patna
2	P/P Singong Hacheng	Tezu, Aru. East
3	P/P F. Lalremruata	Châltlâng
4	P/P Lalsiamthara Tlau	Mission Vêngthlang
5	P/P/ Fredy Lalnunênga	Khatla

◆ Pro. Pastor lâk tharte awmna tûr

<i>Sl.No.</i>	<i>Hming</i>	<i>Awmna tûr</i>
1	P/P K. Malsâwmtluanga	Lawngtlai Chanmari
2	P/P Lallâwmsânga	Champhai Bethel
3	P/P P.C. Lalrotlinga	Tipa
4	P/P Joel Lalruatfela	Bûkpui
5	P/P Lalhruaitluanga	Lungsen
6	P/P Lalhriatpuia	Tiabung Chawnpui
7	P/P Lalhruaizêla Renthlei	Hmawngbu
8	P/P C. Lalhlipuaia	Chawngte P
9	P/P Laldingliana	Fârkâwn
10	P/P Lalthlamuana	Damdep
11	P/P Malsâwmdingliana Renthlei	Bâktâwng
12	P/P Ramchanmawia	Kâwltkulh
13	P/P R.V. Lallâwmzuala	Vânzau
14	P/P Benjamin Laltuangliana	Dârâk

Synod Mission Board

15	P/P P.C. Lalbiakmawia	Mamit
16	P/P H. Thangsângliana	Kolasib Vênglai

Field Worker

17	P/P Ranjit Singha	Kabuganj, Barak Area
18	P/P Sinchung Matadu	Lakla, Aru. East

✪ MSSU

◆ Zirtîrtu Training

Sunday School zirtîrtu training pein hetiang hian trainer-te an chhuak:

Ni 17.1.2026 khân *Bûng-kâwn HS Vêng Kohhranah* Upa K. Vânlalnghâka, Upa Lalchuilova leh Upa H. Lalnghinglova; *Damdep Bialah* Upa K. Zoremsânga, Upa Isak Zârzoliana Chhange leh Upa H. Lalremruata; *Kaisanary Bialah* Upa Hrilthansânga leh Upa Lalsiammawia Pachau.

◆ Trainers' Meet 2026

Ni 22.1.2026 khân Synod Office Devotion Room-ah MSSU Trainers' Meet 2026 buatsaih a ni a, mi 60-ah mi 51 an kal. Meet chawhma lam hi Rev. Dr K. Lallâwmzuala, Executive Secretary i/c MSSU-in a kaihruai a; chawhnu lam chu Upa Lalthahluna Râlte, Co-ordinator-in a kaihruai. Trainers' Meet hi rawngbâwl tûra infuih thar nân hman a ni a; Puitling Sunday School zirlai bu ziaktu Rev. Dr H. Lalrinthanga hovin zirlai an zir lâwk bawk.

✪ KOHHRAN DIN ẸAN NI

January ni 11, 2026 kha Mizoram Presbyterian Kohhran Din Ẹan Ni champhaphâk a ni a. Chawhnuah 'Ringtu leh sum enkawl hna' tih leh zânah 'Mizoram Presbyterian Kohhran leh Pathian ram thawhlâwm' tih thupui zir ho a ni.

✪ KOHHRAN HMEICHHIA

◆ Women Centre-a zir tûr 2026 Batch hawn a ni

Ni 20.1.2026 chhûn dâr 12 khân Women Centre, Phunchawnga zir tûr 2026 Batch hawnna inkhâwm buatsaih a ni. He hun hi Pi Vânlalthlamuani, Vice Chairman-in a kaihruai a; Ni. H. Vânlalruati, General Secretary-in inhmelhriattîrna hun a hmang a; Pi R. Lalrinpuui, Women Centre Superintendent-in hostel rules chungchâng a sawi a; Rev. Dr K. Lallâwmzuala, Executive Secretary i/c Kohhran Hmeichhiain zir tûrte fuihna thu a sawi. Women Centre-a zir tûrte hi puan Ẹhui zir tûr an ni a, zirlai 50 an awm a, kum khat zir tûr a ni. Kum 2024 aẸang khân puan Ẹhui zir chhuakte hi puan Ẹhui khâwl pêk Ẹhin an ni.

✪ KẸP

◆ Charity Fund pe

Rorêl Inkhâwm wawi 11-nain a lo rêl tawh angin, Branch hrang hrangin Synod Hospital Charity Fund puala Ẹum khat inkhâwm thawhlâwm an lâk khâwm ₹12,40,355/- chu ni 5.12.2025 khân Central KẸP hruaituten Synod Hospital Director hnênah an hlân. Hemi rual hian Vairêngte Bial KẸP-in Synod Hospital tâna an pêk ₹5,000/- leh Central KẸP-in kum tina a pêk Ẹhin, Grace Home Cook hlawh tûr ₹96,000 chu hlan nghâl a ni.

◆ Bial KẸP Conference

January ni 23–25, 2026 khân Bial hrang hrangah Bial KẸP Conference hman a ni. Report hnukung bera a lan dânin Bial KẸP 223 leh Branch KẸP 907 a awm a, KẸP member 1,77,548 (mipa 1,07,535 leh hmeichhia 70,013) an awm bawk.

◆ Golden Jubilee hmanpui

Ni 16.1.2026 khân KẸP, Ramthar Vêng Branch Golden Jubilee hmanpuiin Central KẸP hruaitute – Pu C. Lalkhawngaiha, Assistant Secretary leh Pu Rossi Lallâwmawma, Committee Member-te an kal.

✪ SYNOD MISSION BOARD

◆ Zin

January 16–24, 2026 khân Home Mission South-a Synod Mission School hrang hrang tlawhin Pu R. Lalringliana, Supervisor of Schools a kal.

✪ SOCIAL FRONT

◆ Seminar & Campaign

Seminar leh campaign hmanpuuin hetiang hian campaigner-te an chhuak:

January ni 10&11, 2026 khân *Phuaibuang Kohhranah* Mental Health, HIV/AIDS leh Ruihhlo Do Seminar leh Awareness Campaign hmanpuuin Rev. Dr H. Lalnunmawia, Rev. Dr Andrew H. Lalnlanliana leh Rev. H. Lalbiakhluna.

✪ CAMPUS MINISTRY

◆ UESI hruaitute nênkâwm

Ni 21.1.2026 khân Synod Campus Ministry hotute chu Union of Evangelical Students of India (UESI), Mizoram hruaitute nênkâwm a; rawngbâwl ho zêl dân tûr te, tûl leh pawimawh hrang hrang leh thawh hona tha zâwk neih dân tûr te an sawi a ni.

✪ TRUST

◆ Synod House sak enpui

January ni 20&21, 2026 khân Synod House sak mêk enpuuin Pu Lalhriatrenga, JE leh Pu Kros Nuntluanga, JE-te Lungleiah an kal.

✪ SYNFO

◆ Kristian Film Insiamsiak 2025 result puang

Ni 18.12.2025 zân dâr 7 khân Youth Recreation Centre (YRC), Falkland-ah Synfo leh Central KṚP buatsaih Kristian Film Insiamsiak 2025 (Ruihhlo dona lam hawi) result puan leh lâwmman semna hun hman a ni.

Hemi hunah hian Rev. Dr Rosiamliana Tochwang, Executive Secretary-in hunserh a hmang a. Pu Lalniliana, Coordinator, Synfo-in report pein inhmêlhriattîrna hun a hmang a. Judge aiawhin Upa Johnny Lalawmpuiian thu a sawi a, Armed Vêng Branch KṚP-in faklâm an entîr a, Mizoram Synod Choir an zai bawk. Hetah hian lâwmman 1-na dawngtu film en ho a ni a. Programme hi Ni. H. Lalrinpuui, Tuikual Branch KṚP-in a host a ni.

Lâwmman dawngtute chu:

1. Thingsûlthlah Kohhran – Khaidiat
2. Champhai Vêngthlang Kohhran – Zan khat
3. Mission Vêng Kohhran – Mâma Hringnun Diary

Best Actor – F. Zosângliana, Champhai Vêngthlang

Best Actress – Mimi C. Rinpuui, Mission Vêng

Best Supporting Actor – P.C. Vânlalrinpuia, Zêmabâwk

Best Supporting Actress – Jubilee Ramthianghlimi, Champhai Vênglai

Lâwmman atân 1-nain ₹1,00,000, 2-nain ₹70,000 leh 3-nain ₹60,000 leh thuziak an dawng a. Hêng bâkah hian kohhran pasarihin Consolation Prize ₹10,000 theuh an dawng a, intihsika tel zawng zawngten memento an dawng vek bawk. Kristian Film Insiamsiakah hian kohhran 25 an tel. Kristian film hrang hrang hi Synfo Youtube Channel – Synod Information-ah dah vek ania, a duh tân en theih ani.

◆ General Conference pandal en

Ni 20.1.2026 khân KṚP General Conference thlenna tûr pandal enin thawktute – Pu Peter Lalanpuia leh Tv. R. Lalnuntluanga-te Saitualah an kal.

✪ MCC

◆ Industrial Tour

December 1–20, 2025 khân MCC-a BBA 5th Semester zirlaite chuan Chennai-ah Industrial Tour an hmang a, zirlai 17 leh zirtirtu pahnih (Dr Ramnunmawia Pachau leh H. Mal-sâwmzuali)-te an kal. Chennai-ah hian Madras Christian College-in hneh takin an lo thleng a. December ni 4 khân Madras Christian College campus fan kualpui an ni a, December ni 7 khân Chaplain-ten an sâwm angin an inkhâwmnaah zaipâwl an zai a, tlai lamah Northeast Christian Fellowship-in Charity Concert an buatsaihah Guest Artist niin zaipâwl an zai bawk. Industrial Tour-ah hian Madras leh a chhehvêla industry hrang hrang bâkah Pondicherry University an tlawh bawk.

January ni 10–17, 2026 khân MCC-a Commerce 5th Semester zirlai 20 leh zirtirtu 3-te chu Industrial Tour-in New Delhi-ah an kal a, industry hmun hrang hrang an tlawh. Chûng zîngah chuan – Ministry of Commerce & Industry, Govt of India hnuuia India Trade Promotion

Organization (ITPO) te; Ministry of MSME, Govt of India hnuai National Small Industries Corporation Ltd, Okhla te; Ministry of Commerce & Industry, Govt of India hnuai Agricultural and Processed Food Products Export Development Authority (APEDA) leh Ministry of Commerce & Industry, Govt of India hnuai Indian Institute of Foreign Trade (IIFT) te an tlawh.

♦ Exam result chhuak

Mizoram University chuan ni 20.1.2026 khân kum 2025 Odd Semester Exam Results a tichhuak a. MCC pawh a tlangpuiin a ða a. Hetiang hi result chu a ni: Arts 88.24%, Commerce 93.65%, Management 76.92%. MCC zirlai exam zawng zawng 323 aṅangin 284-in an pass a, za zêla 87.93-in an pass a ni.

✪ THAWKTU SIKSAWI

Synod Office-a thawktu ðhenkhat awmna sîksawi a ni a. Hêng mite hi ni 7.1.2026 khân an awmna tûra ruatah hian an awm.

<i>Sl.No.</i>	<i>Hming</i>	<i>Nihna</i>	<i>Tûna awmna</i>	<i>Awmna tûr</i>
1.	Pi Lalkhumtîri	Asst Coord	ATC	ATC (By assignment)
2.	Pi Ruth Lalhmangaihi	Asst Coord	SMB	Koh. Hmeichhia
3.	Tv. Lalringgheta	Asst Coord	GAD	SMB
4.	Tv. Lalsângkima Râlte	Asst Coord	Lâk thar	Social Front
5.	Pu Clayton Malsâwmkima	OA	PRESCOM	Finance
6.	Pi Lahmingsângi	OA	GAD	GAD – Mamawh lamna
7.	Upa Lalrosângka Kâwlni	OA	Finance	Prison Dept
8.	Upa H. Lalhmingmawia	OA	Rescue Home	Hmangaihna In
9.	Pu H. Vânlalhriata	OA	MSSU	MTC
10.	Pu C. Vânlalhmuaka	OA	PRESCOM	Archives
11.	Tv. Joseph Lalmalsâwma	OA	ATC	GAD, Synod Office
12.	Tv. P.C. Vânlalruata	OA	Hmangaihna In	Finance
13.	Pi Rualzamawii	OA	MTC	Koh. Hmeichhia
14.	Pu Simon Malsâwmtluanga	OA	PRESCOM	Rescue Home
15.	Ni. Lalhriattîri	OA	Social Front	GAD, Synod Office
16.	Pi Deborah Lallawmpuii	OA	Koh. Hmeichhia	ATC
17.	Pu Hrângzâmlova	Chowkidar	MTC	Synod Office

TIHDIKNA: KT, January 2026 chhuaka Upa K. Thangmawia zawhnaah khân ‘July 1892’ tih kha ‘July 1872’ tih zâwk tûr a ni a, ‘21 January, 1892’ tih kha ‘21 January, 1872’ tih zâwk tûr a ni bawk. Tin, December 2025 chhuaka phêk 27-na thlûr 2-na tlar 12&13-naa ‘a khum’ tih kha ‘pathum’ tih anga lam zâwk tûr a ni e. Tihsual palhah ngaihdam kan dîl e. – Editor



PATHIAN THU HRILTU HRIAT HLAWH ROBERT CUNVILLE-A A THI

Robert Rieweh Cunville-a, India rama Pathian thu hriltu hriat hlawh, Africa, Asia leh Europe khawmualpuia mi maktaduai tam tak hnêna Pathian thuchah puangtu, a hnua Billy Graham-a nêna rawngbâwl ta chu January ni 17, 2026 khân Shillong-a dam-dawi inah a thi a, kum 86 mi a ni.

Kum 50 zet rawng a bâwl chhûngin, Cunville-a hian ram hrang hrangah rawng a bâwl a; a thiante leh a rawngbâwlpuite chuan a inggaihtlâwmna te, a fawngtai nasatzia te leh mi dang a ngaihsakzia te an sawi nasa hle.

Billy Graham-an Billy Graham Evangelistic Association-a tel ve tûra a sâwm Cunville-a hi a zin nasa hle a; mahse, lâh a duh lo va, 'Thuhriltu ni lovin, Chanchin Tha hi a laipui ber a ni tûr a ni,' tih ngaih dân nei tlat mi a ni.

Cunville-a hi ni 26.12.2025 khân heart attack-in a awm a. Shillong-a enkawl a nih laiin January ni 17, 2026 zîng lam khân a thi ta a ni.

Cunville-a hi ni 15.3.1939 khan Tezpur, Assam-ah a lo piang a, Dr R.L. Cunville-a leh Felicia Kharshiing-ite fapa a ni. A nu leh pate hi thlahtute ațanga Kristian an ni. Billy Graham Evangelistic Association-in a târ lan dânin, chhûngkaw awmthei leh lehkhathiam ațanga lo piang a ni a, hma lam hun êng tak neiin England-ah dân a zir a ni.

Mahse, a Pathian thu ngaih-thlâk ațangin engkim a danglam ta! Tlai khat chu in pakhat leikapui ațanga Pathian thuhril hi a ngaihtla a, Pathianin a sualna a hriattîr a. A sualte simin a nun chu Isua Krista hnênah a hlân ta a ni.

“Chutianga rawngbâwl na lama kal a tum ta chuan a nu leh pate chu a barakhaih hle a; mahse, a thutlûkna leh Pathian kohna chhâng tûra a inpêkna chu an pawmpui ta a ni,” tiin BGEA chuan thu a chhuah.

Kum 1958–1965 chhûng khân Serampore University ațangin BD leh MTh zirin, a zir zo va. Kum 1966 khân Khasi Jaintia Presbyterian Synod-in pastor atân a nemnghet a ni.

Serampore ațanga a graduate hnuin Sohra-a Cherra Theological College-ah lecturer hna a thawk a, NCCI youth secretary hna kum li a thawk bawk.

Kum 1965 khân Shillong nula Carol Rani nêh an innei a, fa 2

an nei. Calcutta-a Union Chapel-ah pastor hna kum li chhûng a thawk leh a. Kum 1998 khân Shillong-a Laitumkhrah Presbyterian Kohhranah a lawi ãan a, a thih thlengin a awm ta a ni.

Mizo mipuiten Curville-a an hriat rengna chu – kum 1988-a Government High School Field-a Crusade-ah speaker a ni a; kum 2012-a Vaivakâwn Field-a Will Graham Crusade-ah khân speaker pakhtah a ãang bawk.

Lalmalsâwma Nghâka, Mizoram PCC Treasurer chuan, “Ringtu inpe zo leh thlarau mi, Krista thihna leh thawhleha leh kraws thuchah puangtu langsar tak a ni,” tiin a sawi.

– CHRISTIAN DAILY INTERNATIONAL

NUPARAWNGBAWLNAIN RETHEITE A CHAWI KANG

Pastor John Isaac-a leh a nupui chuan kum 10 kal ta aãang khân Vijayawada khawpuia mi rethei chênna hmunah rawng an bâwl a. Naupang leh ãhalaite hnênah Pathian thu hrihlin Kristian rin dân an zirtîr ãhîn.

India ram hi khawvêla eibâr lama hmasâwn ram pangana ni mah se, mi rethei bakberh hi maktaduai têt an la awm a. Sawr-kâr leh kohhran tam takin an retheihna ata chawi kân tumin kum tam tak an lo bei tawh a ni.

Pastor John-a leh a nupui hian an thlarau nun a tuihâl tih an hmu thiam a, chumi tireh tûr chuan kum 2016 aãang khân an thawk ta a ni. Hei hi taksa thila retheihna nêna a inzawm tlat a. India ram pumah chuan a ni lo vang a, Pastor Isaac-a te rawngbâwlna hmunah chuan naupang ãhenkhat chu zirna an zawh hmâin hnathawkin an chhuak lo thei lo ãhîn.

“Nu leh pa ãhenkhat chuan an fate an ngaihsak lo va, chu chuan naupangte rilru tina a, an beidawn phah ãhin,” tiin Pastor John-a chuan a sawi a, “Chhûngkaw retheihna avângin nu leh paten an fate chu kum an tlin hmâin hnathawk tûrin an tîr a. A ãhen chuan kum 10 an nihin hna an thawk ãan a. Chu chuan retheihna tâwp thei lo a siam a ni. Retheihna avânga lehkha an thiam lo hi an retheih zêlna chhan lian tak a ni,” a ti bawk.

An rawngbâwlna Kristian ni lote pawhin an hnathawh chu mak takin an thlâwp niin Pastor Isaac-a chuan a sawi a. Vawi khat pawh tualchhûng police-in harsatna an rawn siam a, Muslim nu leh paten an lo chhan niin a sawi.

“A zung aãanga kan beih chuan tisa leh thlarauva retheihna hi kan hneh thei a ni. Chu chu Pathian hnêna ka intiamna a ni,” tiin Pastor John-a chuan a sawi.

– CHRISTIAN TODAY



Sawithuama

Biate Bahzâr Vêng zawhna

Z.1. *Chanchin Ṭha ziaktu Johana te, thlalêra autu Johana te, Thupuana Johana te hi mi thuhmun an ni nge mi hrang daih zâwk?*

Ch. I zawhna hi mi thiamte pawh an inhnial ve fona a ni a. Ngaih dân a rual chiah lo nain, Kristian hmasa zinga mi Justin Martyr-a te, Melito-a, Sardis khua leh Irenaeus-a, Lyons khua te hi chuan mi inangah chuan an ngai deuh chu a ni.

Thlalêra autu Johana hi chu mi hrang a ni e.

(Thla hmasaa mi kha kan lo chhâng kim lo va, kan han chhâng kim leh a ni e. – Ed.)

Lalmangaiha Hmâr

Khatla South Vêngthar zawhna

Z.1. *Kumin Puitling Sunday School zirlai 2-na phêk 10-na tlar 11-naah hian, “Thil siam dang zawng kha chu thu maia*

a siam a ni a. Mihring erawh chu leia vaivut aṭanga a siam a ni a,” tih a ni a. Gen 2:19-ah, “Tin, Lalpa Pathian chuan leiin ramsa tinrêng leh chunglêng sava tinrêng chu a siam a,” tih kan hmu bawk si a. Eng hi nge dik zâwk min han hrilh fiah teh.

Ch. “Hei hi a dik zâwk. Hei hi a dik lo zâwk,” tih fak chu a har ang a. Kan hriat atâna ṭul chu, Genesis-ah hian thil siam thu pahnih a awm a, a hmasa zâwk chu bung 1:1–2:4 a ni. Thil siam chungchâng ziahna hmasa zâwkah hian a thil siamte chu Pathian thua lo awm, thu ngawta siam a ni tih kan hmu thei a. Eng siam thu-ah, “Eng lo awm rawh se,” a ti a, a lo awm a. “Khawmual lang rawh se,” a ti a, a lo awm mai a, etc. Thil siam pahnihna chungchâng chu bung 2:4–25-ah kan hmu a. I sawi ang hian, “Tin, Lalpa Pathian chuan leiin ramsa tinrêng leh chunglêng sava tinrêng chu a siam a,” tih thu kan hmu thung a. He lai thu hi inkalh angin a lang a; mahse, thu lâkna hnâr pahnih aṭanga ziak a ni tih kan hriat a ṭha âwm e.

Z.2. *Phêk 10-na tlar tâwpah, “A taksa chu vaivut ațanga siam a nih avângin thi thei, vaivutah vêk kîr leh tûr a ni,” tih kan hmu a. Eden bawhchhiat hma pawh khân thi thei, vaivûta kîr leh tûra siam kan ni rêng em ni? Nge, bawhchhiat hnuah?*

Ch. Lei vaivuta mihring siam thu hian – mihring chu kumkhuaa nung reng tûr a ni lo va, a thih hnuah vaivuta chang leh tûr a nihzia a entûr a. Mihring chu lei nêna a inzawm tlat a, amah lâk chhuahna leh a taksa mamawh a hmuh nâna a inngahna a ni a, a thih hnuah pawha a kîr lehna tûr a ni (Gen 3:19–23; Job 4:19; Sam 103:14). Chuvângin, mihring chu siam a nih dân rêngah vaivuta kîr leh tûr a nih thu kan hmu a ni. Chuvângin, thlân muala mitthi vuinaah pawh, “Lei chu leiah, vaivut chu vaivutah,” tiin kan chham thîn a ni (Rev. C. Biakmawian Genesis Part I, 1998 Puitling Sunday School zirlaibu a siamah khân chhiar tûr a awm baw e).

Lalduhchhûnga Samlukhai zawhna

Z.1. *Mosia chungchângah Heb 11:24-ah, “Rinnain Mosia chuan, a lo puitlin hnu khân Pharaoa fanua fapaa vuah a duh lo va,” tih kan hmu a. Thuthlung Hluiah Ex 2:15-ah Pharaoan thah a tum avânga a tlân bo thu kan hmu a. Khawi laiah nge Pharaoa fanua fapa a nih duh lohna chanchin hi a lan le? Thu-thlung Thar chu a hnu fea mi a ni si a.*

Ch. Thuthlung Hlui leh Thuthlung Thar hi inlaichîn tlat a nihzia hi kan hriat rêng a tûl âwm e. Mosia chu lal ina sei lian, chanvo tha chang tûr a ni ngei mai. Mahse, chûng zawng zawng ai chuan Pathian mi Israel-te, tihduhdah tuar mêk, ama chipui ngeite nêna tuar chu khawvêl ropuina leh nawmna aiin a thlang ta zâwk a ni a. Khami a thlanna tak kha lal chhûngkaw laka a inlâk hranna chu a ni mai âwm ve!

TIH ZAWK TUR: Kumin Puitling Sunday School zirlaibu phêk 174-naa ‘1. Mizoram buai leh a nghawng’ tih thupui paragraph 1-na tlar tâwp lam kha, ‘Kum 1966 February ni 28 zanlai dâr 12 rîk chiah (‘March ni 1’ ti pawhin a sawi theih) ațangin India sawrkâr laka inlâk hran tumna chu an țan ta a ni,” tih zâwk tûr a ni e. – Editor



THUHRETU ATÂNA KOH

(*Tirh 1:8; Mt 28:19; Mk 16:15*)

– Upa Z. Sângkûnga
Kawrthah
Mobile: 96127 86517

Kan thupui inngahna ‘Ka thuhretute in ni ang’ tih hi Lal Isuan thihna hneha a thawhleha, vâna a lâwn dâwna a zirtîrte hnêna a thuchah hnuhnung a ni a. Zir mite chuan Tirhkohte Thiltih buah hian he thu hi a khai khâwmna niin an ngai hial a. Kohhranho pawhin kan ngai pawimawhin, kohhrana mi tin nihna a nih dân inzirtîrin, kan nihna hi chêt chhuahpui tûrin kan infuih thar reng reng a ni. Mizo Kristiante zîngah chuan ‘thuhretu atâna koh’ tih hi kan hriat than leh sermon thupuiah pawh sawi hlawh tak a ni âwm e.

Heti taka kan sawi zin leh kan ngaihthlâk tam ni si hi ‘Krista thuhretu’ awmzia kan hriat chian tâwk loh vâng nge, a taka nunpui lamah hian kan ðang mawh hle niin a lang. Chuvângin, heti zâwng hian i han zir ho teh ang.

1. Thuhretu awmzia

Zir mite chuan, “*Thuhretu* tih hi Grik ðawnga *martures* tih a ni a, Sâp ðawngin *martyr* tih a ni baw k a; Mizo ðawngin *martar* kan ti ve ta a ni,” an ti. Krista chanchin an puan avânga an nunna hial chânte sawina a ni a. Chuvângin, Lal Isuan, “Ka thuhretute in ni ang,” a tih hian

hriat satliah, nun danglam phah si lo sawina ni lovin, Lal Isua chu Chhandamtu a ni ngei tih hriaa, pawma, a zirtîrnate zâwma, a chhandamna thu puang chhuak zêla, thih a ðul ta a nih pawha thih chillh (martar) inhuamte sawina a ni, kan ti thei ang.

2. Thuhretu chu thiltihtheih-naa thuam a ni

Thuhretu atâna kotu, Pathian chuan a kohna chhângtute chu *thiltihtheihna*-in a thuam ðhîn. “Thlarau Thianghlim chu in chung a lo thlen hunah thiltih-theihna in la nei ang.” (Tirh 1:8) tih ang khân. Hei hi – Thlarau

Thianghlim tanpuina dawngtu chu thiltihtheihnaa thuum a ni thîn tihna a ni. Heta *thiltihtheihna* tih hi Grik tawng chuan *dunamis* a ni a. Chu chu Sâp tawngin *dynamite* tih a ni a, Mizo tawng chuan *lung hâlna* (bomb) kan tih hi a ni. Lung hâlna chuan lung chang apiangah a thawk na thîn a. ‘Chutiang thiltihtheihna chu in nei ang’ a tihna a ni. Krista thuhretu chuan Chanchin Tha dodâlna a nasat poh leh chung lam thiltih-theihnaa thuum a nih avângin a inpêkna chu a zualin, a thiltih-theihna pawh chu a nasa ting mai thîn a lo ni. Lal Isuan, “Tu pawhin mi zui a duh chuan mahni hrehawm pawisa lovin, ni tin a kraws puin mi zui rawh se,” (Lk 9:23) a tih khân a nun chu a thu-nun tawh zâwk thîn. Tawngkam dangin sawi ila, Krista thuhretu atâna inpe chuan thiltihtheihna a dawn chu Krista ropui nân mar-tarpui a huam thîn, tihna a ni.

3. Thuhretu kan nihna tûr hmun

Kan thupui inngahna (Tirh 1:8)-a kan hmu, Lal Isua Krista thuhretu nihna tûr hmun târ lante hi a indawt dân hian awmze ril

tak a nei a. Tawi fel deuhvin han sawi diat diat ila:

(1) Jerusalem-ah: Lal Isua zirtîrte, thuhretu an nihna tûr hmun hmasa ber chu Jerusalem khawpui a ni a. Chu khawpui chu anmahni hre Chiangtute awmna a ni. Anmahni hre Chiangtute hnênah chuan an châk emaw, châk lo emaw Krista thuhretu an nih a tûl ta a ni.

Keini huna kan Jerusalem chu kan chhôngkua, kan kohhran leh kan khawtlâng hi a ni ang. Chuta awmte chu min hre Chiangtute an ni a. Chûng mite hnênah chuan chung lam thiltih-theihna kan dawn ang zia zêlin Krista thuhretu kan ni ve tûr a ni. Krista thuhretu apiangin hei hi i hre reng ang u: “Nangni hi kan lehkha, kan thinlunga zia, mi zawng zawng hriat leh chhiar chu in ni e,” tih hi (2 Kor 3:2). Krista thuhretu apiangte hi mite chuan kan tawngka chhuak te, kan hawiher te leh kan nun te hi an hriain, an lo chhiar thîn a ni.

(2) Judai ramah: Lal Isuan a zirtîrte chu Judai rama mite hnênah a thuhretute ni tûrin thu a pe a. Isua zirtîrte tân chuan

Judai rama mite chu an hotu Isua duh lova, hnâwla, thiam loh chantîra, khêng bet tûra thutlûkna siamtute an ni a. An tân a huphurhawm hle a ni thei e. Nimahsela, chûng mite hnênah pawh chuan Krista thuhretu an nih a tûl si.

Keini pawh, min hre chianga min ngaina lotute zîngah pawh Krista thuhretu kan nih ve a ngaih hun a awm thîn. Kan mihring rilru aţanga kan ngainat loh zâwng tak te, Chanchin Ṭha pawh eng atân maha ngai lo nia kan ngaih te hnênah pawh Krista thuhretu kan nih a ngai thîn. Lal Isuan, “Ngai teh u, chinghne zînga berâm awm angin ka tirh che u hi; chutichuan, rûl anga fînga, ṭhuro anga pawî khawih lovin awm ang che u,” a tih hi i hre nawn fo vang u (Mt 10:16).

(3) Samari ramah: Lal Isua hian a zirtîrte chu Jerusalem khawpuia mite leh Judai rama mite hnêna a thuhretu an nih chu a duhtâwk mai lo. Hnam inthlah pawlh chênna – Samari ramah pawh a thuhretu ni tûrin a la ti ta zêl a ni. Samari mite chu Judaten uicho ang leka an ngaih leh biak pawh an biak duh loh an ni

a. Mahse, chûng mite zîngah pawh chuan Isua zirtîrte chu a thuhretute an nih a ngai.

Keini pawh hi, kan mihring thinlungin a ngainat loh leh kan ina rawn lêng tûra kan duh lohte hnênah pawh Krista thuhretu kan nih a ngai thîn. Kan Lal Isua pawh khân a thinlungah hnam rilru zîm tê chu dah bovin, Samari hmeichhe hnênah Chanchin Ṭha a hrilh tih kan hria (Jn 4:1–42).

(4) Kâwilkil thlengin: Lal Isua hian a zirtîrte chu an rawngbâwlna hmun atân an châkna hmun leh an duhsak zâwngte hnênah chauh a tîr hauh lo. Khawvêl hmun tin leh hnam tin zînga a thuhretute ni tûrin thu a la pe ta zêl a ni. Lal Isuan a sawi ang ngeiin a zirtîrte chuan an hun laia khawvêl hmun hrang hranga mite hnênah Chanchin Ṭha hrilin, Krista thuhretute an nih an lanfîr a. A zîrtîr Thoma ngei pawh India ramah a lo kal nia sawi a ni.

Keini tân chuan kâwilkila mite chu – kan hmêlhriat ngai loh leh an awm ve a ni tih pawh kan hriat lohte hi an ni ang. Chûng mite hnênah pawh chuan Krista thuhretu rinawm kan nih zêl a

ngai. Chûng mite hnêna thuhretu ni tûr chuan kan kal chhuah a ngai thîn. Kal chhuak thei lote pawhin *ṭawngṭai* leh *thilpêk* hmangin Chhandamna Chanchin Ṭha kan hril thei, hla phuahtuin, “Kal chhuak thei lote pawhin mawhphurhna lian tak kan nei, Thilpêka rawngbâwl tûrin Lalpan min ko,” a tih ang khân (KHB No. 590).

Tlângkawmna: Thuhretu tih awmzia te, thuhretu chu thiltih-theihnaa thuam a nihzia te leh thuhretu mawhphurhna te, thuhretu kan nihna hmun tûr hmun te chenin kan sawi ta a. Thuhretu atâna min kotu chuan, “Lei leh vâna thuneihna zawng zawng pêk in ni tawh. Chuti-chuan, kal ula, hnam tina mi zirtîrahte siam ula, Pa leh Fapa leh Thlarau Thianghlim hmingah

chuan baptis ula, thu ka pêk zawng zawng che u pawm tûrin zirtîr rawh u. Tin, ngai teh u, kei kumkhuain, khawvêl tâwp thleng pawhin in hnênah ka awm zêl ang,” a ti a (Mt 28:18–20). Engtin nge kan chhân dâwn le? Lal Isua Krista kohna chhânga, a tâna ‘thuhretu rinawm leh ṭahnemngaite’ tân chuan Lalpan a malsâwmna a chhawp reng a ni tih hi i hre reng ang u.

“Thih thlengin rinawmin lo awm rawh. Tichuan, nunna lallukhum ka pe ang che,” tia, “Ngai teh, ka lo kal thuai dâwn e; mi tin an thil tih ang zêla pêk tûrin ka lâwmman ka hnênah a awm,” (Thup 2:10; 22:12) titu kan Lalpahan a thutiam hi a hlen ngei dâwn avângin, Isua Krista thuhretu rinawm ni zêl tûrin Pathianin min pui ṭheuh rawh se. Amen.

HRIATTIRNA

1. Kohhran pakhatah Kristian Tlângau agent pakhat zêl neih tûr a ni a. Chanchinbu la tam kohhran, agent pakhat aia tam nei thînte pawhin agent pakhat neiin, a ṭûl angin sub-agent ruat mai tûr a ni. Chanchinbu man pêk leh office lam nêna indâwrna pawh agent kaltlang zêla tih tûr a ni.
2. Tlângau agent, copy 10 chin semte hnênah a thlâwnin copy 1 pêk ṭhin a ni a. Sub-agent-te hnênah erawh chuan, copy 30 chin semte hnênah copy 1 a thlâwna pêk ṭhin a ni.

LAL ISUA A LO KAL THUAI DAWN

– *Upa Lalsavunga
Vanghmun*

Bible-ah hian Lal Isua chungchâng thu – kum 700 hma lamah a pian tûr thu te, thil mak tam tak a ti chung pawha an rin theih loh tûr thu te, ropui taka Jerusalema chawimawia a luh tûr thu te, keimahni avânga a tuar thu zâwlneiten an hrilh lâwkte chu a lo thleng dik chat chat zêl a ni.

Vawi khat chu India mi, ringthar thenkhat, Canada rama awmte chu missionary pakhat hnênah an lo kal a, zawhna dangdai tak mai hetiang hian an zawt a: “Pathian hnathawh tawhte min hrilh thîn a. Pathianin eng nge a tih zêl dâwn tih hriat kan duh,” tiin. He zawhna pawimawh tak mai hi khawiah nge kan hmuh le? A chhâna chu Pathian thu-ah Chiang takin kan hmu. Chu chu – ALO KAL LEH DAWN tih hi a ni (Thup 22:20; Tirh 1:11–19).

Thupuan 22:20-ah phei hi chuan, Patmos thliarkârah Johana hnênah Lal Isuan, “A ni, ka lo kal thuai dâwn e,” a ti. Hêng bâkah hian Chanchin Tha ziaktute leh lehkhathawn ziaktute pawhin an ziaak bawk. Thu-thlung Thar pum puiah hian Lal Isua lo kal leh tûr thu hi vawi 318 vêl awma sawi a ni a. Thu-thlung Thar châng 24 dan zêlah Lal Isua lo kal leh tûr thu hi sawi niin hriat a ni a, bung hrang hrang 260 vêlah awma sawi a ni.

Heti khawpa ngaih pawimawh leh sawi tam ni si hi

kohhran inkhâwmah hian sawi tam a hlauh lo hle si hi mak tak a ni.

Thuhriltu Lalpa (Prince of the Preacher) an tih mai, Mizote pawhin kan ngaihsân êm êm, Spurgeon Sâp chuan, “Pastor-te leh thuhriltuten Lal Isua lo kal lehna thu hi an sawi fo lo vang. A chhan chu – Setana huat ber, duh loh ber leh hlauh ber a ni. Lal Isua lo kal lehna hi an sawi fo chuan, Lal Isua tâwk tûrin mite an inbuatsaih ang a, kohhrante an lo harh ang a, Pathian ram a lo zau dâwn a ni.

Chu vâng chuan thiam takin Setana chuan hna a thawk a ni,” a ti. Mahsela, khêl lovin eng tik hunah emaw chuan Lal Isua hi amah ringtute hruai tûrin a lo kal leh ngei ngei dâwn a ni.

1 Thes 4:16–18-ah chuan, Lal Isua chu au thâwm nêh, vântirhkoh chungnung ber âw nêh, Pathian tawtawrâwt ri nêh vântirhkoh a lo chhuk dâwn tiin Paula chuan Thessalonika khuaa ringtute hnênah a sawi a. Lal Isua hi a lo kal leh hunah chuan amah maiin a lo kal dâwn lo va, kan hmangaih kal Tate, Kristaa muhîlte chu a rualin a rawn hruai dâwn a ni. Tichuan, nunga lo la awm rengte nêh chuan boruakah khian hlim êm êmin kan intâwk khâwm dâwn a ni. Chutah chuan Lal Isuan ro a rêl ang a, khawvêla kan dam chhûnga kan thil tih ang zêlin ro a rêl dâwn a ni.

Chu hma lam hun ropui tak chu lung in rimchhia leh hrehawm taka Krista avâng a tân laiin – “Keini zawng vâh khua leh tui kan ni si a, vâh aţanga min chhandamtu Lal Isua Krista lo kal tûr chu ngâkhlel takin kan thlîr a ni,” a ti. Chumi hunah chuan hrehawm rêng rêng a awm

tawh dâwn lo va, nuam zawng zawng a kim tawh ang. A va nghahhlelhawm em!

Aw le, Lal Isua lo kal lehna hi a hnai tak tak tawh em le? Hei hi ngaihvena, ngaihtuah tak tak a hun ta hle. Lal Isua lo kal lehna hi tu mân a hun leh ni kan hre lo. Marka 13:32-ah chuan, “Pa chauh lo chuan, tu mân, vâh vântirhkohte pawhin, Fapa pawhin an hre lo,” Lal Isuan a ti a ni. Lal Isua Olive tâng a awm laiin a zirtîrten, “I lo kal lehna leh khawvêl tâwpna chhin-chhiahna chu eng nge ni ang min hrilh rawh,” tia an zawh khân Lal Isuan chu zawhna pawimawh tak chu Matthaia bung 24 kan chhiar chuan a chhânna kan hmu (chhiar rawh le). Chanchin Ṭha ziaktu dang pawhin an ziaak bawk.

Chhiartu duh takte u, tûnlai khawvêl awm dân te chu in hria a ni lo’ m ni? Inpeih lote inpeih a hun, sual tihchah pawh a hun ta, kan tân khua a tlai hma hian hnung lam paiha hma lam ûmin ṭawngṭai leh pianthar a hun ta.

LAL ISUA TAWK TURIN
I INPEIH ANG U.

RINNA

(*Heb 11:1*)

– T. Zachula
Aizâwl Vênglai

Rinna hi thil beiseite awm ngeia hriatna, thil hmuh lohte hriat fiahna a ni tih kan hmu a. Tehkhinna han sawi hmasa ila. Thlawhhma kan nei a, kum tâwpah buh tam tak thar beiseiin rinnain lo kan vât a, hah taka buh tuhin hlo kan thlo va. Kum tâwpah kan beisei ang ngeiin buh chu kan thar ta a, a awmzia kan hre fiah ta thîn a ni.

Miten Pathian chhandamna an chan hian, “Pathian thu hi sâng takah emaw, hla takah emaw awmin ka lo ring thîn a, hniam takah a lo awm zâwk a nih hi,” an ti thîn. Kan chhûngah, kan thinlungah Pathianin min lo dahsak daih tawh a, chu chu kan hre chhuak thîn.

Rom 10:1–10-ah chuan, “Thu chuan a hnaih a che, i kê leh i thinlungah pawh a awm,” tih kan hmu. Chu chu rinna thu kan hril thîn hi a ni. “I kain Isua chu Lalpa a ni tih i ãana, mitthi zîng ata Pathianin a kaitho tih i thinlunga i rin chuan chhandamin i awm ang,” tih hi miten thinlungin an ring a, felna an hmu thîn a; kain an ãan a, chhandamna an hmu bawk thîn a ni tiin kan Pathian thu hian min lo hrilh daih tawh a ni. Kan chhûnga Pathian thu awm chu kan hriat chhuah ni apiangin Pathian kan fak thîn a ni.

Tirhkoh Paulan, Timothea hnêna lehkha a thawnah chuan,

“Nimahsela, nang zawng, tu hnêna zir nge i nih leh, Krista Isuaa rinna awm avâng chuan, chhandamna hmu khawpa tifing thei che Lehkha Thianghlimte chu i naupan têt ata hre tawh i ni tih inhriain, i thil zir leh i hriat chianahte chuan awm reng rawh,” a lo ti a (2 Tim 3:14,15).

Pathian thu hi thenkhat phei chuan kan chhiar tamin kan hre tam tawh a. Mahse, Bible kan chhiarah hian kan awm reng thei lo a nih hi. Paulan Timothea hnênah, “I naupan têt ațanga Pathian thu i chhiarah khân awm reng rawh. Chhandamna a awm a ni,” a tih hi keini pawhin kan pawm mai a va ãa êm!

Hebrai 11:17–19-ah rinnain Abraham a fiahin a awm a. Pathianin a fapa mal neih chhun Isaaka chu Moria rama tlâng pakhtah hlân tûrin a hrilh a. Pathian thutiam dawngtu chuan a fapa mal, a neih chhun chu a hlân ta a ni. Mitthi pawh Pathian chuan a kaitho thei ang tih a ring a, thi hnu nung leh ang maiin a hmu kêr leh ta rêng a ni.

Kan Pathian hian kan duh lai ngei hi a duh tlat mai a ni. Kan pawisa, hah taka kan thawh chhuah ve chhun te hi a ram zau nân pe tûrin min duh tlat mai. Inhlawh chawpa ei zawng tân chuan pêk a har khawp mai. Sawrkâr hnathawk tân chuan pêk a awl deuh mai thei e. Pathian chuan kan thinlung a en zâwk thîn. Pathian hmangaihna, a Fapa mal neih chhun kan tâna a rawn pêk hi kan hriat chian poh leh a tân pêk kan châk thîn. Pathian hman-gaihna kan hriat zawh loh avâng hian kan neih chhun hi kan ui thîn a lo ni. Miin Pathian tân a neih a ui loh chuan malsâwmna chi hrang hrangin a vûr thîn a, a pêk belh-chhah zâwk thîn a lo ni. Bible-ah kan hmu a, “A ram leh a felna zawng hmasa ula, in mamawh

zawng zawng chu ka pêk belh-chhah ang che u,” min ti a ni.

Rinna hi Kristiana Vânrâm Kawng Zawh buah kan hmu a. An khua chu boralna khua a ni tih a hre Chiang a, rei lo teah an khua leh a mi chêng zawng zawng chu an boral vek dawn tih a hre Chiang a. A nupui leh a fate kalsanin, a chungpikna phurrit phur chungin an khua chu a chhuahsan a, ring leh beisei chungin chatuana boral tawh lohna vânrâm a pan a, beidawnna leh harsatna tâwk chungin vânrâm a thleng a. Pathianin a lo lâwm lût a ni.

Bible-in min hrilh angin, kan chênna khawvêl hi a la boral dawn tih hi kan hre tam khawp mai. Kristiana ang hian kan hre Chiang tak tak lo a ni ang, kan la thlamuang êm mai. Camping-ah te lût thîn mah ila, Pathian thu chu kan ngaithla thîn a, kan chhuak a, kan luh hma ang bawk khân kan awm leh thîn. Hawh u, kan Pathianin a thu kan kêr leh kan thinlunga a dah, chhandamna tling a ni tih min hrilh hi i pawmin i zâwm mai teh ang u.

Kan Pathian chuan, “Ka fa, i thinlung min pe rawh,” a ti. Kan pe phal dawn em?

ARTICLE LEHKHABU ṬHA CHHIAR PAWIMAWHNA

– R. Nelsona

Mission Vêng, Aizâwl

Phone : 96121 63791

Lehkhabu ṭha chhiar tûr chuan, lehkhabu hi a ṭha vek lêm lo tih hriat a ngai a. Mihring nun tikhawlo thei chi te, hurna lama min hruai thei chi te, ruih theih thila min hruai thei chi te, nawmsip bâwlâna lam min châktîr thei te leh mi tihnat leh tihchhiat châkna min neihtîr theitu lam te, mite thlabârna thlen thei chi te, helna rilru siam thei te, mahni intihhlum duhna min neihtîr thei te, thlarau nun hruai khawlo thei chi te hi chu lehkhabu ṭha lo a ni tih hriat tel tûr a ni.

Lehkhabu ṭha chuan nun-phung dikah min hruai thei a, tih tûr dik min kawhmmuhin, a tih dân tûr nêl lam min hriattîr thei. Lungngaihnaah min chhâwkin min tihlim hlauh thei a, khawhar-naah min hnêm thei bawk. Har-satna su kiang tûrin min pui thei a, chakna min pein hnehtuah min chhuah hlauh thei. Hriatna a tizau va, mi a tifing ṭhîn.

Lehkhabu ṭha hi thil zirna bulpui ber a ni a. Lehkhabu hi awm lo se, mi thiam leh lehkha thiamte an thihin zir zêl tûr awm lovin, mi thiam leh lehkha thiam hi kan nei zui zêl thei dân lo a ni. Zirna pêng tinrêng hi thil lo chîk hmasatu leh lo hre hmasatuten lehkhabu ṭha an lo ziah,

chhiar leh zir aṭanga kan hriat chhâwn, chu vângâ lehkha thiam leh mi thiam ni thei kan ni chauh a ni. Chuvângin, lehkhabu ṭha chu hlawhtlinna kailâwn a ni.

Chhiar peih lo tân chuan mahni chênna ram leh mahni hnam chanchin ngei pawh hi a hriat loh theih hle. Chutiang mi chu tu ma ngaihsân tlâk an ni ngai lo. Chhiar tam erawh chuan a hmuh phâk loh leh hmasâng chanchin thlengin a hriat pah ṭhîn a, a thusawi leh a thu ziahte a ngaihnawm bâkah zir thamin mahni ram leh hnam chanchin pawh a ziah theih pah ṭhîn. Chuvângin, lehkhabu ṭha chhiar tam hi hriatna hnâr a ni.

Zir sâng lem lo mah se, lehkhabu tha chhiar tam chuan thil a hre zau va, a hriat zau miau chuan mi fing a lo ni a, mi dangte kawng dik leh thaah a hruai thei a, a awmna apiangah miten a thu leh hla ngaihthlâk an châk thîn. A tân a tangkai hlei hlei bawk. A finna nêñ tang kawpin mi hlawhtling a lo ni hial thei a ni. Lehkhabu tha chhiar vângin awmhmun atângin khawvêl ram hrang hrang chanchin kan hre thei a; an tih dân tha la chhâwng-in dinhmun thaah kan din phah thei bawk.

Lehkhabu tha chuan nun phung dik leh thaah min hruai thei a, mi dang tân entawn tlâk nun kan neih phah thei. Chu chuan mi dang a zirtîr chhâwngin a hruai tha hlauh thei bawk. “Lehkhabu awm lohna in chu tukverh nei lo in ang a ni,” an lo ti a; lehkhabu tha chhiar ngai lo pawh tukverh nei lo ina chêng ang mai an ni bawk. Lehkhabu tha chhiar chu boruak tha ang maia mihring nuna tangkai a nih chu.

Lehkhabu tha chuan ram pum a sawi danglam thei

Pu Tawma In (Uncle Tom’s Cabin) chuan America rama

bawih neih bantir duhna mipui rilruah a thlen a, bawih bân tûra bul tantirtua ngaih a ni hial mai. Karl Marx-an a zirtîrna ‘Marxism’ ziahna lehkhabu a theh darh pawh China chuan an tangkaipui tak meuh va, an din chhuahpui kan ti thei hial ang.

Bible phei chu chhawrtu kan tam lehzual a, ram ropui leh langsar ber berte hi a chhawrtu an ni hlawm. Chûng zînga langsar zualte chu – United Kingdom te, Germany te, United States of America te hi an ni a. Keini tu khaw hriat loh hnam tlem leh mâwl tak ni thîn pawhin kan din chhuahpui ve mêk a nih hi.

Politician tha ni tûr pawhin ram inrêlbâwlna tha hriat hmasak a ngai a. Chumi atân pawh chuan lehkhabu tha chhiar tam tho hi a kawng chu a ni. Ram hruaituten lehkhabu tha an chhiar tama, chumi anga ram an hruai chuan an din chhuah phah thîn a ni. Mi ropui, mi thiam bik leh ram hruaitu ropuite hi lehkha chhiar tam an ni vek a. Chu bâkah, an thil hriat tha a puitlin nâna thawk zuite phei chu mi hlawhtling an ni thîn a, ram tâna

mi hlu an ni. Lehkha chhiar peih lo chu mi hman tlâk an ni thei tak tak ngai lo. Lehkhabu tha chhiar tam chu mi thiam, mi ropui, mi zahawm leh hruaitu ropui nih theihna a ni.

Chhûnkaw tha din tûr pawhin lehkhabu tha chuan nasa takin mi a kaihrui thei. Nupui/Pasal zawn aţang hrimin mahni tâna tha tûr min kawhmmuh thîn. Hriat loh vâng a tih fuh loh theih lakah min vêng him thei a, tihsual lakah min chhanhim thei a, kan tlin tâwka tha ber tûr kan hriat theih phah. Fanau enkawlna kawngah nasa takin min pui a, ei zawna kawngah pawh kan phâk tâwka tha ber ber min hriattîr thîn.

Sakhaw lamah pawh lehkhabu tha bawk hi a ţang kai zêl. Eng sakhua pawh hian zir chhâwn zêl tûr lehkhabu kan mamawh vek a, a tel lo chuan kal zêl ngaihna a awm lo. Lehkhabu awm hmaa ţawngkama inhlan chhâwn chuan a daihzai thei lo va, a thawk hlâwk mawh bik thîn. Ziaka theh darh theih a nih chuan, zirtîrtu awm hran lo pawhin a chhiartute rilruah hna a thawk thei tho va, a chak

phah thîn. Bible hi nei lo ta ila, Kristianna pawh hi a ding khawchhuak zo kher lo vang. Ni khua a rei chuan, sawi chhâwn dân a lo dang hret hret a, zirtîrna thuhmun pawh a lo danglam mai thîn a ni.

Thlarau nun kawng dik min kawhmmuh theitu pawh sakhaw lehkhabu thate hi a ni a. Mahni sakhaw lehkhabu tha chhiar ngai lo mi chu a sakhaw vawnah mi hman tlâk a ni thei ngai lo. Chutih rualin, mahni sakhaw lehkhabu chhiar tam chuan a hre tamin a hre fiah nge nge a. A sawi chhâwng thiam emaw, thiam lo emaw, zirtîrtu leh kaihrui tlingah a ţang mai thîn. Thlarau nun kawng dika hrui thei sakhaw lehkhabu tha, Bible chuan vân thlengin min hrui thei. Khawvêl hman dân te, nun dân tha te min kawhmmuh a, khawvêl hi nuam takin min hmantîr thîn. Lungngaihna, hrehawmna, manganna, tuarna, lu sînna leh phurrit dang zawng zawng pawh hneh dân min zirtîr a, min kaihrui a, hnehtuah min siam thîn. Mi dang tân pawh chhawrawm kan nih phah thei. Lehkhabu tha chu zirtîrtu tha ang

TLAI NGAI LO ISUA A TLAI

– R. Thangpianga
Biata

Bethani khuua Lazara damlo kha Isua an va hrilh a, a lo kal chuan a dam mai an ring a. Mahse, Isua chuan, “He natna hi thihna tûr a ni lo. Pathian ropuina tûr a ni,” a lo ti a, a kal ta lo va. A zirtûrte nêh Judai ramah an kal ta daih a. Hetia Isua a kal tâk mai loh vah chuan Mari te chu an beidawng êm êm mai a, lo kal har an ti a, tlai an ti tawh baw si a, a rim te pawh a chhiat mai an hlau va. Chu vâng chuan, thlân ker kuakah an zalh ta a ni. Hetia Mari te chhûngin an phûm ta mai hi an fel hle a ni. An thiamawm a ni. Ni li lai a ni tawh si a. Isua hi a tlai a ni.

Kan Lal Isua khân a thawhle hnu khân a zirtûrte hnênah, khawvêl zawng zawng kala Chanchin Ṭha hril tûrin thu a pe a. Tichuan, a zirtûrte zînga mi, Galili rama piang Juda mi, Thoma chuan AD 52-ah India rama Tamil Nadu state, Madras (Tûnah Chennai) a lo thlenga. Tichuan, Lal Isua chanchin chu ṭhahnemngai takin a hril ta a, mi tam tak Kristianah a siam a. Chanchin Ṭha chu huai takin a hril zêl a. Chutia mi tam tak Kristiana a siam ta mai chu an hua a, rorêltu hnênah an hêk a. Tichuan, AD 70 vêlah Thoma chu an tihlum ta a ni. Thoma hi Isua vânga martar hmasa berpâwl a ni âwm e. Tichuan, Tamil Nadu state chuan Lal Isua chanchin chu a lo hre ta a ni. Isua chanchin hi an lo hre hma hle mai. An va nihlawh êm! An va awhawm êm!

Khawvêlin hma a sâwn zêl a, India ramah pawh ram dang sumdâwng an rawn lût a, chûng zîngah chuan Sâp te pawh an rawn tel ve a. A rei deuh hnuah phei chuan East India Company te an din ta hial a. An zîngah Kristian te pawh an tel ve a ni âwm e. Zawi zawiin Calcutta-ah biak in te an din a, Kristian pawh an pung zêl a. Tichuan, mi ṭhenkhat chu Assam-ah te an lo kal a, Khasi ramah te, Naga ramah te leh Manipur-ah te Kristian sakhua a lo ding ta a; keini Mizoramah erawh chuan an lo kal ve lo a ni. Kum 1891 khân Khasi ram aṭangin Rev. William Williams-a chu Mizoramah a lo kal zawk a. Chu chu Mizorama Kristianna lo luhna bulah kan ngai ta a. Amah-

erawhchu, kum 1894-a Pu Buanga leh Sâp Upa lo kal kha Mizo mipuiten anâwlpuia Kristianna kan hriat tanna chu a ni. Tichuan, kum 1899-ah baptisma chang hmasa berten baptisma an chang a. Kan ramah Kristianna chu a t̄hang duang êm êm a. Kum 1944-ah chuan a kum 50-na kan lâwm ta a ni. A lâwmawm hle mai.

Hla phuah thiam Bernard-a (1091–1153) chuan – “Isu, i thu ka ngaihtuahin, ka lo lâwm êm êm t̄hîn; I hmêl tak ka hmuh hunah chuan ka lâwmna a zual ang,” a lo ti daih tawh a. “Mite hian Lal Isua hi an lo va hmu hmasa bîk êm!” te ka ti a. Mizote hi ‘Lalpa zawn chhuah ram, Kristian state’ kan inti a. Keini aia Chanchin T̄ha hre hmasa hi ram dang an lo va tam êm, t̄h ka ngaihtuah chuan Lal Isua hi keini Mizote tân hian a t̄lai ka ti t̄hîn a, ka vui deuh t̄hîn.

Kan ramin Chanchin T̄ha a hriat t̄an – kum 1891 hma lama kan pi leh pute kha hlauh ngah êm êm an ni a. An nat hlek tawh chuan mawhpuh t̄ur an zawng a, thing bul lung bul te kha mi tina theia ringin an t̄lawn a, ran chi t̄inrêngin an inthawi a. An thla a muang chuang lo. Amaherawhchu, an

chai ni chuan an hlimin nuam an ti êm êm a, an lâm nasa a, an t̄laivâr hial t̄hîn. Mahse, an hlim leh lâwmna chu a reh leh mai a, an lungngaih leh mangannate chu a ngai a ni leh mai t̄hîn.

Ka pu, ka pa pa kha a hun lai chuan sadâwt/puithiam an tih hi a ni a, mi tam tak a thawi t̄hîn. Ka pian hma hian ka pu chu Kristian a ni a, a puithiam hna te chu a bânsan a. Kum 1958, ka tlangvâl hnuah kum 88 mi niin a thi a. Ka pu pate, ka pu pu lehte kha Kristian an ni ve lo va. Lal Isua hi hria sela chuan an duh ve ngei ang.

Hlaphuahtuin, “Ka dâwn ngam lo, hmangaihna khua a vâr hmaa famte zawng chu,” a tih ka ngaihtuah châng te hian, kan pi leh pute, hlau leh thlaphâng rêngrênga awma, lungdamna tak eng mah hmu lote kha, “Isua – engkima lungawina leh hlimna mai bâkah chatuan nunna min petu hian engtin ngai ang maw!” te ka ti a. Kan pi leh pute – an duh loh vânga hre lo ni si lo, an mâwl vâng pawh ni lo, Chanchin T̄hain a thlen loh mai vânga boral tate thlarau kha ka ngaihtuah chhuah châng hian, keini Mizote tân hian Lal Isua hi a t̄lai ka va ti t̄hîn êm!

MIZOTE HI ISRAEL-TE HNENA CHANCHIN ȚHA HRIL TUR KAN NI EM?

– *Upa Vâla
Maubâwk*

Isaia 41:27-ah chuan, “Keiin Zion hnenah chuan, ‘En teh, anni saw en teh,’ ka ti hmasa ang a; Jerusalem hnênah chuan Chanchin Țha rawn thlentu pakhat ka pe ang,” tih kan hmu a. Israel-te hnênah hian Chanchin Țha thlentu, Jerusalem-ah a la pe dâwn a ni ang, a tih theih em?

Aw le, kan thupui sawi tûr hi zawhna a ni a. Kan ram hruaitute leh, kan kohhran hruaitute leh a chhiar apiangin lo ngaihtuah ve ula, Israel-te hnênah hian Mizote hian Chanchin Țha hi hril ve tûr kan nihna a awm em? Mizote hi Israel hnam bo zînga hnam khat, Manasia hnam niah kan insawi a, mi mâwl mai ni lo, mi hre zau tak takte pawhin an sawi ve fo va. Israel hnam, Manasia thlah hnam kan nih Israel Chief Rabi pawhin min pawm niin an sawi a. Chu vâng chuan Mizo Israel intite chu Judaism an zawm vângin Israel ramah an pêm thei ta a, mi eng emaw zât chu an pêm ta a ni.

Tûnlai hian kan mi thiam thenkhat pawhin, “Mizote hi Israel hnam bo zinga mi, Manasia hnam kan ni e,” an rawn ti ve leh ta zêl a. Mi tam tak pawhin kan rilruah kan ngaihtuah ve fo âwm e. Tin, Israel sawrkâr thleng pawhin an ngaihsak ve niin a hriat

a, mi sângnga pêm lehna tûr pawh an tihsak leh mêk nia sawi a ni a, chanchinbuah te pawh kan hmu a. An pêm thlâk leh chuan Israel ramah kan Mizopui sâng eng emaw zât an awm dâwn tihna a ni a. Lal Isua ringa bosan lehte an ni a. Chutah, Israel rama Judate lah an lal Messia haia la harh lo reng an ni a. Chûng Juda hnam thleng pawha Chanchin Țha hmanga tiharh tûr hian Pathianin min hman duh a rinawm.


Chutiang tûr chuan tu kohhranin emaw Bial Inkhâwm-puiah agenda-ah rawn siam sela, Presbytery kaltlangin Synod-in

rawn pass sela, Mizo ƣawng chauh thiam pawh missionary-ah kal sela, Israel ƣawnga let thei Mizo tam tak an awm dâwn a, an ƣawng zir kher lo pawhin a thawh theih dâwn a ni. Pathian thlarauvin hna a thawh phei chuan kan hlapui sak ƣhin, “Juda hnam zawng zawng pawh an Lal Messia hmu leh hriain an lo harh ang, engkim a lo thar tawh ang,” tia kan sak ang khân, Israel ramah harhna ropui a thlentîr thei a ni.

Mizote hian, Dârphawka te Pathianin a lo hmuhtîr angin, tuipui râl ƣangin Chanchin Ƣha kan dawng a, thlarau harhnain min chîl chhuak a, missionary rilru pu nghâlin Tuikuk ramah te, Chakma ramah te an chhuak a. A aia hla Manipur-ah te pawh kalin an hril zau zêl a, India ramahte kal chhuakin tûnah chuan Sâp ram (Wales ram) te, US-ah te an kal zêl a. Kan hmabâk chu Israel ram hi a ni dawn lo’ m ni? Israel hnam bo zînga mi, Manasia thlah kan lo nih phei chuan, Israel hnam bo zînga Kristian ram a hlawma awm chhun pawh kan lo ni mai thei asin.

Chuvângin, kan hnampui Israel-te hnêna Chanchin Ƣha hril hi kan bat a ni dâwn lo’ m ni? Rom 11:23-ah Paulan, “Anni pawh chu ring lova an awm reng loh chuan zawmin an awm ang; Pathianin anmahni a zawm leh thei si a,” a ti a. Paula vêkin Rom 10:19-ah, “Chia sawi tham lohte chu hmangin ka thîktîr ang che u a,” tia a sawi ang deuh khân Rom 10:14-ah, “A nih leh, an rin lohva chu engtin nge an lam ang? A thu an hriat lohva chu engtin nge an rin ang? Thuhriltu awm lovin engtin nge an hriat ang?” a lo tih ang deuh hian, keini pawhin Israel ramah hian Chanchin Ƣha kan hril a ngai dâwn lo’ m ni? Manasia hnam kan lo nih phei chuan, “Juda hnam zawng zawng an Lal Messia hmu leh hriain an lo harh ang,” tih hla ang khân, an harh thuai theih nân kan hrilh ve hi an ngai dâwn lo’ m ni?

Kan Synod hian hma han la se, Pathian pawhin a hnam thlan bo lehte an ni a, min puiin a tiharih ngei ang tih a rinawm. Chuvângin, Mizote hian Israel-te hnêna Chanchin Ƣha hril hi kan tih ve tûr a ni dâwn lo’ m ni?



**REV. S.R. LALKAILUAIA
DAWRPUI VENGTHAR WEST
(1941–2025)**



Rev. S.R. Lalkailuaia (84) hi ni 21.1.1941-ah Tualchêng khuah, Sailo lal Lianguauva lal laiin a lo piang a; Upa Chalchhûnga Râlte Siakêng Dârkim leh Thangseii Fânai-te fa 11 zînga a 6-na a ni. Ni 16.5.1967-ah Kâwlthikûngi nêh Tualchêngah an innei a; fa 7, tu 12 leh tuchhuan 2 an nei.

Kum 1946-ah Lungphunlian bâwkah sikul a lût tan a. Aiduzâwl ME School aţangin Pâwl 6 a zo va; kum 1957-ah Saitual High School aţangin Matric a zo a ni.

Kum 1963-ah Maite khuua Middle English School hawn tharah Head Master hna a thawk a. Kum 1965-ah Maite khuah vêk Chhimchhak Presbytery-in a hawn thar High School-ah zirtîr hna a thawk leh a. Kum chanve

hnuah Middle School-a thawk tûrin Tualchêngah a insawn leh a. Kum 1966 ram buaiin a nan avângin a thawk thei ta lo a ni.

Kum 1968-ah Pathian thu zir tûra lâk a ni a. Pathian thu a zir zawhah LTh Certifcate pêk a ni a. Kum 1972-ah Thingsûlthliah Bialah Pro. Pastor hna a thawk a, 1975 Synod-in a nemnghet.

Kum 1976-ah Keiţum Bial thar a vawng a. Keiţuma a awm lai hian Synod duh dânin BTh a zir leh a. Kum 1986-ah S. Hlimen Pastor Bial (Tûnah Hlimen Bial)-ah sawn a ni a. Kum 1993-ah Dâwrpui Vêngthar Pastor Bialah sawn a ni leh a. Kum 2001-ah Synod Moderator niin Mission Vêngah a awm a, 2002 kum tîrah a pension ta a ni. Pastor hna a thawh chhûngin nupa tuak 394 a inneihţîr a, mi 3,155 a baptis a. A pension hnuah nupa tuak 48 a inneihţîr a, mi 36 a baptis bawk.

Bial Chairman-ah vawi 12 leh Presbytery Moderator-ah vawi 4 a ţang a. Synod Moderator (2021) leh Synod Secretary (1991–1992) a ni a. Kum 2008 khân FG&CC, Mission Vêngah counsellor hna contract-in a thawk bawk.

A pension hnuah Dâwrpui Vêngtharah a inbêngbel a. Kum 2006-a Dâwrpui Vêngthar West Kohhran a indan khân chu lamah chuan a lawi a, Synod sum vawngtu hna kum 2006–2021 chhûng a chel. 'Kohhran Upa

nupui' tih leh lehkhabu dang pathum a ziak.

Kum 2009 khân a chuap a TB a, kum 2014 khân Gland TB natna a vei leh a. A dam fel chauh tihin a rîlpui a cancer leh a. Vâneihthlâk takin a cancer chu a dam a. Hemi hnu hian chuap leh lung tha lo vângin enkawl a ni leh a.

September 2024 khân refer a nih angin RN Tagore Hospital, Kolkata panpui a ni a. Hetah hian thisen cancer chi khat (Plasma myeloma) a ni tih hriat a ni. Ni 19.10.2025 zînga a tho chu a thaw a hah avângin Synod Hospital panpui a ni a; ni 8.11.2025-ah damdawi in aţangin a chhuak a.

Ni 16.11.2025-ah stroke vângin Trinity Hospital-ah admit

a ni a, tha takin a chhuak leh a. Ni 20.12.2025 aţangin a tho kâng peih ta lo va. Ni 25.12.2025 khân Synod Hospital, Durtlângah admit a ni a, ni 29.12.2025 tlai lamah ICU-ah dah a ni. A tûk ni 30.12.2025 (Thawhlehni) zîng dâr 8:15 vêlah ventilator hmantîr a ni a. Hemi zân dâr 6:35 hian Lalpa hnênah min chawhlsan ta a ni.

A tûk chawhma dâr 11:30-ah Rev. D. Zobiaka, Bialtu Pastor-in Kohhran Hall-ah thlahna hun a hmang a. Chawhnu dâr 1-ah Rev. John Râldosânga, Synod Moderator-in biak inah a vui a. Kohhranhoten ui tak chungin kan thlah liam ta a ni.

*Rev. B. Zohmangaiha
Synod Secretary*

**UPA H. ZATHIANGA
HMUNHMELTHA
(1936–2025)**



Upa H. Zaţhianga (89) hi ni 15.8.1936-ah Hmunhmêltha khuuah a lo piang a; Lianţhuama leh Kâpmawii-te fa 9 zînga a tlumber a ni. Ni 11.5.1959-ah Rothangpui nêan innei a; fa 6, tu 18 leh tuchhuan 32 an nei.

Kum 2002–2010 chhûng Tual Upa a ni a. Ni 10.10.2010-ah Champhai North Presbytery-in Champhai Bethel Kohhran Biak Inah Hmunhmêltha Kohhran Upa atân a nemnghet.

Tualchhûng kohhranah chanvo chi hrang hrang a chelh tawh a. MSSU Chawimawina Diploma leh Jubilee Award a dawng tawh.

Pa hrisêl tak ţhin a ni a. Ni 26.3.2024 khân stroke vânga tluin a malpui vei lam ruh a sawh tliak a. ZMC&H, Falkâwnah zai a nih hnuin in lama inenkawl chhunzawm tûrin a haw a, biak in te pawh a thleng leh thei a. Ni


10.9.2025 khân rîl cancer a ni tih hriat a ni a. Damdawi inah enkawl a nih hnuin a natna chuan zual lam a pan zêl a. Ni 20.10.2025 (Thawhtanni) chawhnu dâr 1:30 khân Lalpa hnênah min chawlh-san ta a ni.

A tûk chawhma dâr 11-ah Upa C. Vânlalhriatpuia, Kohhran Chairman-in in lamah thlahna hun

a hmang a. Chawhnu dâr 1-ah Rev. Vânlalruata, Champhai North Presbytery Moderator-in biak inah a vui a. Kohhran Zai-pâwlin amah sûnna hla an rem a. Kohhranhote ui tak chungin kan thlah liam ta a ni.

*Upa H. Lalduhawma
Hmunhmêlthā Kohhran Ziaktu*

**UPA ZAMZACHINA
MIMBUNG
(1942–2025)**



Upa Zamzachina (83) hi ni 1.9.1942-ah Mîmbung khuaah a lo piang a; a pa chu Kimpum a ni. Ni 24.4.1964-ah Sînggaii nê an innei a; fa 5 an nei.

Kum 1983-ah Teikhang Kohhran Biak Inah Hmârchhak Presbytery-in Mîmbung Kohhran Upa atân a nemnghet a ni.

Tualchhûng kohhranah chan-vo chi hrang hrang a chelh tawh a. Bialah Chairman a ni tawh a, Standing Committee-ah a tel tawh bawk. Presbytery Standing Committee-ah a tel tawh a. Synod Executive Committee-ah a lo tel tawh bawk.

Khawtlâng rawngbâwlna lamah VC Vice President term 3 leh member-ah term 2 a tâng tawh bawk.

Mi hrisêl tak a ni tîn a. Ni 2.11.2025 a tângin chau deuhva a inhriat avângin a inkhâwm peih lo va. Ni 10.11.2025-ah Mîmbung PHC-ah a inentîr a, a kal a tha lo tih hriat a ni a, thawhah a nei bawk. Oxygen pea theihtâwpa enkawl a ni chungin, November ni 11, 2025 (Thawhlehi) zân dâr 11:20 khân Lalpa hnênah min chawlh-san ta a ni.

A tûk chawhma dâr 10:30-ah Pro. Pastor Ramthangliana Fanai (Teikhang)-in in lamah thlahna hun a hmang a. Chawhnu dâr 1-ah Rev. E. Ramchullova, Hmâr-chhak Presbytery Moderator-in biak inah a vui a. Teikhang Pastor Bial Zaipâwlin sûnna hla an rem a. Kohhranhote ui tak chungin kan thlah liam ta a ni.

*Upa Dâlzathang Hauzêl
Mîmbung Kohhran Ziaktu*

**UPA C. LIANKUNGA
COLLEGE VENG, AIZAWL
(1957–2025)**



Upa C. Liankûnga (68) hi ni 15.12.1957 khân Reiek khuah a lo piang a; Ramhluna leh Chhâwnthangi-te fa 8 zînga mi a ni. A patea (C. Lalrinliana, Zêmabâwk) hnênah a sei lian. Ni 31.10.1981 khân Thannguri nê an innei a; fa 4 leh tu 8 an nei.

Kum 1980-ah Primary School zirtîrtu hna a thawk ãan a. Daido leh Khawlianah a thawh hnuin Sesawng Primary School–I-ah a thawh laiin Headmaster-ah a kaisâng a. Kum 2005 khân Zêmabâwk Primary School–II-ah sawn niin Zêmabâwkah an pêm nghâl a, kum 2021 January thla khân upat pension-in a chhuak. Ni 20.8.2024 khân Zêmabâwk ațangin College Vêng, Aizâwlah an rawn pêm leh a ni.

Sesawnga a awm lai hian a phâk ang tawkin Pathian rawngbâwlnaah a inhmang thîn a. Sesawng Branch KṚP-ah Office Bearer post a chelh kim vek a, Thingsûl Pastor Bialah Bial Zaipâwl member leh Bial KṚP Leader a ni tawh bawk.

Kum 1999 khân Sesawng Kohhran Upa atân nemngheh a ni.

Sesawng Kohhrana a awm laiin rawngbâwlna chanvo chi hrang hrang a chelh a, kum 2006–2008 khân inneihna kawltu a ni bawk. Bialah Secretary leh Sunday School Secretary a ni tawh a. Presbytery Statistician a ni tawh bawk. Mashi Sangati rawngbâwlna leh Bible Society rawngbâwlnaah a tui êm êm bawk.

Kum 2002 ațangin thisen sâng a nei ãan a. Kum 2013 khân stroke a nei thut mai a. Aizâwla enkawl a nih hnuin CMC, Vellore panpui a ni a. Theihtâwpa enkawl niin CMC, Vellore-a in-check-up-in ãum hnih kalpui a ni a. Heti chung hian thisen sâng hian a tibuai deuh reng a, wawi li lai a stroke leh nghe nghe. Kum 2024 ațang khân kal lam ãat loh avângin dialysis tih a lo ngai ta a. Hmasâwn lam aiin hniam lam a pan zêl a. Synod Hospital ICU leh LRM Hospital ICU-ahte enkawl a nih hnuin ni 21.1.2025 (Thawhlehi) zîng dâr 6:25 khân Lalpa hnênah min chawhhsan ta a ni.

Hemi ni vêk chawhnu dâr 1-ah Rev. F. Lalhmingthanga, Dâwrpui Bial Pastor-in an chênna inah a vui a. Kohhranhoten ui tak chungin kan thlah liam ta a ni.

*Upa Lalthangvunga Sailo
College Vêng Kohhran Ziaktu*

**UPA T.C. LALHMANGAIHA
THENZAWL
(1941–2025)**



Upa T.C. Lalhmangaiha (84) hi ni 8.8.1941 khân Thênzâwl khuuah a lo piang a; Khûma leh Lalngaii-te fapa a ni. Kum 1960-ah Chhandami nê an innei a, fa 13 an nei. A nupui hi ni 2.1.2023 khân a sùn a ni.

Kut hnathawka eizawng, mi taima êm êm mai, awm âwl thiam lo, lo neih leh thlai huan siama thlai lama intodelh reng mai a ni a. Mi kawm nuam leh nui duh tak, titia inkawm nuam ti êm êm thîn a ni a. A bula awm a hahdam-thlâk thîn hle a ni.

Kum 1974-ah Thênzâwl Kohhranah Tual Upa atân thlan a ni a. Kum 1991-ah Chhimchhak Presbytery-in Sêrchhîp Veng-chung Kohhran Biak Inah Thênzâwl Kohhran Upa atân a nemnghet.

Tualchhûng kohhranah chan-vo chi hrang hrang a chelh tawh a, inneihna kawltu a ni tawh a, MSSU aṅangin Sunday School zirtirtu kum 50 chhûng châwl lova


ṅang chawimawina, Jubilee Award a dawng tawh bawk. Bialah Chairman a ni tawh a, committee hrang hrangah a tel tawh bawk. Presbytery-ah Nomination leh Standing Committee-ahte a tel tawh a. Synod Music Committee-ah a tel tawh bawk.

Kum 2019 khân thih ngamin a na a. Aizâwl damdawi inah zai a ni a. Pathian thidamna changin ṅa takin a awm leh a, kohhran ho leh chhûngkhat lainate pawh kan lâwm hle a ni. Chutih laiin, ni 20.10.2024 khân a insawisêl leh deuh avângin Thênzâwl CHC panpui a ni a. ZMC-ah refer niin, test chi hrang hrang tih a nih hnuah a chuap lam a fel lo tih hriat a ni a. Ni 28.10.2024-ah in lama inenkawl tûrin hawpui a ni a. Amah pawh a ṅat viau laiin ni 19.2.2025 tlai lam khân a chau thut a, chuta ṅang chuan ṅat lam a pan thei ta lo va, ni 23.2.2025 (Pathianni) zân dâr 7 khân Lalpa hnênah a châwl ta a ni.

A tûkah in lamah Rev. T. Chawikhûma, Bialtu Pastor-in thlahna hun a hmang a. Chumi hnuah Upa C. Vânlalthîra, Ramlai Presbytery Moderator-in biak inah a vui a. Bial Zaipâwlin sûnna hla an rem a. Kohhran mipuiten ui tak chungin kan thlah liam ta a ni.

*Upa V. Lalhuapzauva
Thênzâwl Kohhran Ziaktu*

**UPA ROHMINGHLUANA
SAMLUKHAI
(1936–2025)**



Upa Rohminghlwana (89) hi ni 15.12.1936 khân South Sabual khuuah a lo piang a; Dârrokûnga leh Challianthangi-te fa 6 zînga a 5-na a ni. Ni 4.7.1963-ah Rualchhîngi nêh an innei a, fa 10 leh tu 5 an nei. Kum 2023 khân an inneih diamond jubilee hi him takin chhîngkuain an lâwm a ni.

Kum 1961-ah Samlukhaiah zirfirtu hna a thawk ãan a, January ni 1, 2002 khân Samlukhai PS Headmaster hna a ãangin a pension. Kum 1981 khân zirfirtu ãaah thlan a nih avângin sawkâr ruahmannain India rama hmun pawimawhte ãawha zin kualpui zîngah a tel. Ram buai lai khân VC te a ãawiamw ãhîn a. Kum 1967-ah sipaiten manin Karimganj Jail-ah a ãang a. Hemi kum December thlaah chhuah leh a ni.

Kum 1975-ah Chhimphei Presbytery-in Samlukhai Kohhran Upa atân a nemnghet.

Tualchhûng kohhranah chanvo chi hrang hrang a chelh tawh a, kum 2024 khân MSSU a ãangin Jubilee Award a dawng. Sialsûk Pastor Bial Chairman a ni tawh a. Synod Education Board-ah a tel

tawh a, PCI Assembly-ah a palai tawh bawk. Chhimphei Presbytery-in Kohhran Upa a nih kum 50-na lawmpuina a hlân tawh bawk.

Tûna Samlukhai Kohhran Biak In hmunah hian an awm ãhîn a. Hmun dangah insawn chhuakin a in hmun chu biak in hmun atân kohhran a pe a. A chungah kohhran a lâwm hle a ni.

Ei zawna avângin Aizâwl lamah a nupui fanaute an awm deuh vek avângin an bula khawsa ve mai tûra an tih pawhin, “*Samlukhai Upa atâna thlan ka ni a, ka pêm chhuahsan thei lo a ni,*” a ti ãhîn. Amaherawhchu, a hun hnuhnung lamah pêm lêm lovin Aizâwl lamah a khawsa ve ta deuh va, Kulikâwn West Kohhranah a lawi a ni.

Ni 3.2.2025 khân khuh nasa leh ke vûng avângin Alpha Hospital-ah admit a ni a. Hetah hian a natna kaw sa COPD bâkah pneumonia a nei tih hriat a ni a. Enkawlna pêk a nih hnuah in lama haw a chhâk êm avângin hawpui a ni a. February ni 15-ah damdawi inah luhpui leh a ni a. Ni 19.2.2025 zânah ICU-ah dah a ni a. Ni 3.3.2025 (Thawhtanni) zân dâr 9:30 khân Lalpa hnênah a chhâwl ta a ni.

Kulikâwn lamah a ruang a awm avângin Chhimphei Presbytery-in a vui ta lo va. Ni 4.3.2025 chawhnu dâr 1-ah Rev. Lalrinmawian Kulikâwn West Kohhran Hall-ah a vui a. Kohhranhoten ui tak chungin kan thlah liam ta a ni.

*Upa Lâwmzuala
Samlukhai Kohhran Ziaktu*

**UPA KHAIZATHANGA
NURSERY VENGLAI, AIZAWL
(1941–2025)**



Upa Khaizathanga (84) hi kum 1941 khân a lo piang a; Vumzakam leh Huai Khup-te fa 11 zînga a 8-na a ni. December ni 21, 1964-ah an khaw nula, N. Chini nêan a khua aţanga mêl 10 vêla hla, Zaingên khuaah biak in hawngin an innei a; fa 6 an nei.

An khuaa sikul awm chhun Roman Catholic School-ah zirlaibu pawh nei lovin sikul a kal ve thîn a. Chhûngkaw harsatna avânga kal chhunzawm thei lovin a ni te zuiin hlo a thlo ve ta a ni.

December 1959-ah 1st Assam Rifles-ah a ţang a. Ram a buai hnu khân Zoram hmun hrang hrangah a awm kual a. Kum 1971 vêl aţangin Battalion Hqrs., Aizâwlah a awm nghet. Ni 15.7.1985-ah Naik (*Bel hnih*)-in a pension a, Nursery Vêngah an inbêngbel ta a ni.

April 1974 khân 1st AR Kohhranah Tual Upa atân thlan a ni a, wavi eng emaw zât thlan nawn a ni. Sipai aţanga a pension hnuah 1st AR Kohhranah hun eng emaw chen an lawi hnuin kum 1991 khân Bûngkâwn Kohhranah an lawi ta a. Kum 1993-a Nursery Vêng Preaching Station a lo din

khân Committee Member atân ruat a ni a. Kum 1994-ah Nursery Vêng Kohhranah Tualchhûng Upa atân thlan a ni a. Kum 1997-ah Kohhran Upa atân thlan a ni. Kum 1998-ah Aizâwl Chhim Presbytery-in Mission Vêngthlang Kohhran Biak Inah Nursery Vêng Kohhran Upa atân a nemnghet.

Tualchhûng kohhranah chanvo chi hrang hrang a chelh tawh a, MSSU aţangin Chawimawina Diploma leh Jubilee Award a dawng tawh a. Kum 2003–2011 chhûng inneihna kawltu a ni a, nupa tuak 38 a inneihtîr. Bial leh Presbytery Committee hrang hrangah telin Synod Inkhâwmpuiah wavi eng emaw zât a palai tawh bawk. Kum 2016 khân Nursery Vênglai Kohhran indanpuitu Upa zîngah a tel.

Ni 12.2.2025 khân a chau va, a thaw a hah bawk a. Damdawi in panpuin HDU-ah dah nghâl a ni a, kâr hnih hnuah in lamah enkawl zui a ni. Ni 22.4.2025 (Thawhlehi)-a tûkthuan a ei kham chu a thaw ţha hlei thei lo va. Theihtâwpa bawisâwm a ni chungin zîng dâr 9:30-ah Lalpa hnênah a châwl ta a ni.

A tûkah Rev. F. Lalchhuan-awma, Bialtu Pastor-in lamah thlahna hun a hmang a. Chumi hnuah Upa Lalchâmliana, Aizâwl Chhimthlang Presbytery Moderator-in biak inah a vui a. Kohhran Zaipâwlin sûnna hla an rem a. Kohhranhoten ui tak chungin kan thlah liam ta a ni.

*Upa C. Krostlansânga
Nursery Vênglai Kohhran Ziaktu*

**UPA SAWRKHARLIANA SAILO
CHALRANG
(1942–2025)**



Upa Sawrkhârliana Sailo (83) hi kum 1942-ah Chalrâng khuuah a lo piang a; Rosema leh Sâng-chhîngi-te fapa a ni. Unau pianpui 16 a nei. Kum 1964 khân P.C. Lalthankhûmi nêan an innei a; fa 6 an nei.

Kum 1980-ah Chalrâng Middle School-ah Craft Teacher hna thawk ãanin kum 2016 khân a pension. Amah hi pa taima leh invawng fel tak, hnathawhnaa tlai ngai lo, thawhpui nuam leh tlâwmngai tak a ni.

VC Vice President a ni tawh a, YMA-ah kum li chhûng Vice president a ni tawh a, MUP-ah Vice President leh Adviser a ni tawh bawk.

Kum 1982-ah Tual Upa atân thlan a ni a. Kum 1999-ah Kohhran Upa atân thlan a ni a. Hemi kum vêk hian Tuichângrâl Presbytery-in Khawhai South Kohhran Biak Inah Chalrâng Kohhran Upa atân a nemnghet.

Tualchhûng kohhranah chanvo chi hrang hrang a chelh tawh

a. MSSU ațangin kum 50 chhûng châwl lova zirtîr hna thawk chawimawina, Jubilee Award a dawng tawh bawk. Bial Chairman a ni tawh a. Synod lamah PRESCOM Board-ah a tel tawh bawk.

Amah hi mi hrisêl ãha leh harhvâng tak a ni a, insawisêlna êm êm pawh a nei ngai vak lo va. Kum 2025 February thla khân Aizâwlah in-check-up tûrin a kal a, stroke a ni tih hriat a ni a. Aizâwl lamah hun eng emaw chen enkawl a ni a, April thlaah ãha takin hawpui a ni. In lamah enkawl a ni a. A natna hian zual lam a pan hret hret a. June thlaah Aizâwl lama in-check-up leh tûra tih ni mah se, amah a chak loh tâk êm avângin kalpui ngam a ni ta lo va. In lamah theihtâwp chhuaha enkawl a nih laiin ni 23.6.2025 (Thawhtanni) zîng dâr 6:15 khân Lalpa hnênah a châwl ta a ni.

Hemi ni vêk chawhma dâr 11-ah Rev. Ngûrthanmawia Sailo, Bialtu Pastor-in in lamah thlahna hun a hmang a. Chawhnu dâr 2-ah Rev. Lalzidinga, Tuichângrâl North Presbytery Moderator-in biak inah a vui a. Kohhran Zaipâwlin súnna hla an sa a. Kohhranhoten ui takin chungin kan thlah liam ta a ni.

*Upa R. Lalremruata
Chalrâng Kohhran Ziaktu*

**UPA THLAHAIA
LENGPUI
(1945–2025)**



Upa Thlahaia (80) hi ni 17.9.1945-ah Khawhai khuaah a lo piang a; a pa chu Zasânga a ni a, a nu chu Thangluaii a ni. An unau hi mipa 2 an ni. Kum 1975-ah Lêngpui ah anrawn pêm a, an awm hlen ta a ni. Ni 10.6.1977-ah Vânlalchawii nê an innei a; fa 3 an nei. Ni 12.2.2000 khân nupui a sôn a, nupui nei leh tawh lovin a fate hi a tûlpui ta a ni.

Hnam sipaiah a tâng ve tawh a, kum thum chhûng chu jail bang a lo zût ve tawh nghe nghe. Govt Middle School-I, Lêngpui ah Substitute Teacher hna te, Govt Lêngpui High School-ah Teacher leh Headmaster hnate a thawh hnuin kum 2010 khân a pension a ni.

Kum 1988 khân Chhimthlang Presbytery-in Reiek Kohhran Biak Inah Lêngpui Kohhran Upa atân a nemnghet.

Tualchhûng kohhranah chanvo chi hrang hrang a chelh tawh a, MSSU Chawimawina Diploma a dawng tawh a, inneihna kawltu a nih chhûng (2009–2014)-in nupa tuak 7 a inkutsuihtîr bawk. Bialah

Chairman (1997&2017), Secretary (1990–1995), Statis-tician (1986–1989) leh Synod sum vawngtu (1998–2015) a ni tawh a. Presbytery-ah Moderator (2002) leh Secretary (1990–1998) a ni tawh a. Synod-ah SEC (1998–2000), Finance (1992–1994) leh Education Board (1995–1997) Committee-ahte a tel tawh a; Mizoram Synod aiawhin Manipur Synod-ah a palai tawh bawk.

Ni 23.7.2024 khân a chuap a cancer tih hriat a ni a. Chemo te lain enkawl zui a ni a, Synod Hospital, Durtlângah hun eng emaw chen enkawl a ni. Dam taka a chhuah hnuah in lamah enkawl zui a ni a. Ni 20.4.2025 khân Lêngpui Pastor Bial Diamond Jubilee monument lungphun hawng tûrn lîrtheia han phurh thlâk a ni a, lungphun chu a hawng hrâm a. A taksa a chak loh zual avângin ni 3.6.2025 zân khân Ebenezer Hospital, Aizâwl panpui a ni a. Ni 25.6.2025 (Nilaini) zîng dâr 6:50 khân Lalpa hnênah a châwl ta a ni.

Hemi ni vêk chhûn dâr 12-ah Rev. Lalchungnunga Hahnâr, Bialtu Pastor-in in lamah thlahna hun a hmang a. Chumi hnuah Upa Zairemmawia, Tlawng Presbytery Moderator-in biak inah a vui a. Bial Zai-pâwl leh Kohhran Zai-pâwlten sônna hla an rem a. Kohhranhoten ui tak chungin kan thlah liam ta a ni.

*Upa J.B. Thanga
Lêngpui Kohhran Ziaktu*

**UPA H. THANGMAWIA
NORTH KHAWBUNG
(1940–2025)**



Upa H. Thangmawia (85) hi ni 17.4.1940-ah Tualpui khuaah a lo piang a; Khawtinthanga leh Chhonzovi-te fa 7 zînga a 6-na a ni. Kum 1967-ah Sângthuaami nêan an nei a, fa 9 an nei. Ni 4.9.2021 khân a nupui hi a sîn a ni.

A nu leh pa aţanga Kristian niin, kum 1963 aţangin Naupang Sunday School zirtîrtuah a thawk ţan a. Department hrang hrangah thawk tawhin, hêng hun lai hian Pathian thu exam-ah lâwmman (Holy Bible) te pawh a lo dawng tawh a ni.

Ni 27.5.1990-ah North Khawbung Kohhran Tual Upa atân thlan a ni a, ni 11.11.1990-ah Kohhran Upa atân thlan a ni. Ni 13.10.1991-ah Champhai North Presbytery-in North Khawbung Kohhran Upa atân a nemnghet.

Tualchhûng kohhranah chanvo chi hrang hrang a chelh tawh a. Kum 2014 khân Mizo Sunday School Union-in kum 25 chhûng kum hloh lova Sunday School

zirtîrtu ţang zâwnte hnêna a pêk ţhin Chawimawina Diploma leh Bible a lo pe tawh a. Bial leh Presbytery-ah chanvo pawimawh tak tak a chelh tawh bawk. Bible Society rawngbâwlina hi a tuipui hle a. A nupui nêan BSI-ah Patron Member an ni ve ve nghe nghe.

Amah hi Kohhran Upa nih tling tak leh rawngbâwlina ngai pawimawh tak, Lalpa kohnaa ngai tlat mi a ni a. A dam phawt chuan inkhâwm te, committee te leh inkhâwpui te a ţhulh ngai lo. A upat deuh hnuah pawh riak lût tûrin a kal hrâm hrâm ţhin a ni.

Kum 2025 a lo her chhuak a, hun lâwmawm tak kan hmang ho zêl tûra kan ngaih laiin âwmvêl natnain a tlâkbuak ta a. Hun eng emaw chen in lamah enkawl a ni a. A natna chuan zual lam a pan zêl a. Ni 28.6.2025 (Inrinni) khân Lalpa hnênah min chawhhsan ta a ni.

Atûk chawhma dâr 11-ah Rev. Vânlalruata, Bialtu Pastor-in in lamah thlahna hun a hmang a. Chawhnu dâr 1-ah Rev. Albert Lalchhanhima, Champhai North Presbytery Moderator-in Biak Inah a vui a. Kohhran Zaipâwlin amah sînna hla an sa a, kohhranhoten ui tak chungin kan thlah liam ta a ni.

*Upa K. Lalvûra
North Khawbung Kohhran Ziaktu*

**UPA R. SANGKUNGA
SIALHAWK
(1942–2025)**



Upa R. Sângkûnga (83) hi ni 2.2.1942 khân Sialhâwk khuah a lo piang a; Upa Liansânga leh Lalawmi-te fa 8 zînga a naupang ber a ni. February ni 12, 1963-ah Chawngtleng khaw nula Biakliani nêh Sêrchhîp Kohhran Biak Inah an innei a, fa 7 an nei. A nupui hi ni 20.6.2008 khân a sùn a ni.

Ram buai avanga Sialhâwk Middle School khâr tawh chu a remhriatna leh a thahnemngaihna, kum 1969-ah ama hovin hawn leh a ni a, hlawh mumal pawh nei lova eng emaw chen an thawh hnuah sawrkârin a enkawl zui leh ta a. Kum 2013 khân a pension.

Kum 1970-ah Tualchhûng Upa atân thlan a ni a. Kum 1981-ah Tuichânggrâl Presbytery-in Khawhai Kohhran Biak Inah Sialhâwk Kohhran Upa atân a nemnght a ni.

Tualchhûng kohhranah chanvo chi hrang hrang a chelh tawh a, hun rei tak ziaktu a ni. Bialah chanvo pawimawh chi hrang hrang a chelh a, Chairman hna pawh tum hnih a chelh a ni. Tuichânggrâl Presbytery-ah ziaktu chanvo hun eng emaw chen a chelh hnuin Moderator a ni a. Tuichânggrâl North Presbytery a lo pian khân Moderator-ah a tâng leh bawk. Synod Committee hrang hrangah kum 18 lai a tel a. Mizoram Synod aiawhin Evangelical Free Church of Maraland Centenary lawmnaah Rev. C. Lalñanliana nêh an kal tawh bawk.

A hun hnuhnung lamah hian natnain a tlâkbuak a, vawi tam tak a inentîr a, hma a sâwn hlei thei lo va. Ni 6.8.2025 (Nilaini)-a a zîng tho chu a khum bulah a tlu a, nikhaw hre lovin a awm zui a, hemi ni chawhma dâr 10 hian Lalpa hnênah a châwl ta a ni.

A tûk chawhma dâr 11:30-ah Rev. C. Lalrinliana, Bialtu Pastor-in in lamah thlahna hun a hmang a. Chawhnu dâr 1-ah Rev. Lalzidinga, Tuichânggrâl North Presbytery Moderator-in biak inah a vui a. Bial Zaipâwlin súnna hla an rem a. Kohhranhoten ui tak chungin kan thlah liam ta a ni.

*Upa Huanmawia Kâwni
Sialhâwk Kohhran Ziaktu*

TLANGAU BU MAN

Tlângau bu man hi lâk hun chhûnga pêk tûr a ni a, kum tûrah/lâk tan dâwnah pêk fel tûr a ni. Chutianga inbuatsaih tûr chuan agent-te pawh kan ngên e. – Cir. Manager

**UPA LALHMACHHUANA
TLANGNUAM VENGTAR
(1949–2025)**



Upa Lalhmachhuana (76) hi ni 13.6.1949 khân Maite khuaah a lo piang a; Thanghrima leh Chhîngpuiliani-te fa 10 zînga a naupang ber dawttu a ni. Ni 19.2.1978-ah Vânlalhmuaiki nê an innei a, fa 5 an nei.

Pâwl 10 thleng a zir a, ram buai avâng leh chhûngkaw harsatna avângin a zir chhonzawm thei ta lo a ni. Kum 1973-ah PWD hnuaiah Section Assistant (SA) hna a zawm a, khaw hrang hrangah a awm kual thîn. Kum 1999-ah JE-ah a kaisâng a, kum 2003-ah Aizâwlah transfer a ni a, ni 1.6.2014 khân a pension a ni.

Ni 24.4.2005-ah Tlângnuam Vêngthar Kohhran Tualchhung Upa atân thlan a ni a. Ni 14.1.2007-ah Kohhran Upa atân thlan a ni. Ni 14.10.2007 khân Aizâwl Chhim Presbytery-in Saikhamakâwn Kohhran Biak Inah Tlângnuam Vêngthar Kohhran Upa atân a nemnghet.

Tualchhûng kohhranah chanvo chi hrang hrang a chelh tawh

a. Kulikâwn Pastor Bialah Standing leh Ramthar Committee-ahte a tel tawh a. Kulikâwn Pastor Bial aţanga a indan hnuah Tlângnuam Pastor Bialah Chairman, Secretary leh Treasurer a ni tawh a. Aizâwl Chhim Presbytery Standing Committee-ah a tel tawh a. Synod Education Board-ah a tel tawh bawk. TBZ, MPF leh BSI rawngbâwlinaah pawh hun eng emaw chen hruaitu a lo ni tawh bawk.

2024 kum tâwp lam khân a pum lam a sawisêl a, a kawthalo a reh mai theih loh avângin ngaihtat lohna a nei a. 2024 November thla tîrah Trinity Hospital, Mêlthumah full body check-up a ti a. Hetah hian rîlpui cancer a ni tih hriat a ni. Hei vâng hian kohhranah a lang tam thei lo tial tial a. Ni 28.7.2025 khân ICU-ah dah a ni a. Heta tâng hian hniam lam a pan zêl a, ni 9.8.2025 (Inrinni) chawhnu dâr 1:20 khân Lalpa hnênah a châwl ta a ni.

Atûk chawhma dâr 11-ah Rev. H. Lalthananga, Bialtu Pastor-in in lamah thlahna hun a hmang a. Chawhnu dâr 1-ah Upa B. Bâwlkhûma, Aizâwl Chhim Presbytery Moderator-in biak inah a vui a. Kohhran Zaipâwlin sînna hla an rem a. Kohhranhoten ui tak chungin kan thlah liam ta a ni.

*Upa Lallunghnêma
Tlângnuam Vêngthar Kohhran
Ziaktu*

**UPA C. LIANZUALA
LENGPUI
(1929–2025)**



Upa C. Lianzuala (96) hi ni 10.8.1929 khân Tanhril khuaah a lo piang a; Upa Chalunga leh Lalngihllovi-te fa 8 zînga mi a ni. Ni 15.5.1950 khân Sawizâmi, West Sêrzâwl nêh Tanhrilah an innei a. Kum 1976 khân a nupui hi a sùn a. Kum 1988 khân Vâmawii, Lêngpui nêh Dâwrpui Vêngthar Kohhran Biak Inah an innei ve leh a. Ani pawh hi ni 26.5.2001 khân a sùn ve leh bawk.

Tanhril aţangin kum 1948-ah West Sêrzâwlah an pêm a. Kum 1969-ah Lêngpui ah an rawn pêm a. Kum 1986-ah Aizâwlah an pem a. Kum 2000-ah Lêngpui ah an rawn pem leh a, a awm hlen ta a ni. Fa 8 a nei.

Kum 1956–1961 chhûng W. Sêrzâwlah Tual Upa a ni a. Kum 1961-ah Kohhran Upa atân thlan a ni. Kum 1962 khân Khawthlang Presbytery-in Kawrtethawveng Kohhran Biak Inah W. Sêrzâwl Kohhran Upa atân a nemnghet.

Kum 1982-ah Lêngpui Kohhranah Upa atân thlan nawn a ni. Sawi khâwma pêmte hi an Upa

nihna chhawm theih a nih laiin, ani hi chu Tanhril lama a nu leh pate a han pui kha pêm anga ziah a nih avângin a chhawm ve thei lo va, thlan nawn a ni ta a ni.

Tualchhûng kohhranah chanvo chi hrang hrang a chelh tawh a. Lêngpui Pastor Bial Standing Committee-ah a tel tawh bawk. Kum 2022 Tlawng Presbytery-in Kohhran Upa a nih kum 60-na lawmpuina a hlân.

Kum 1986–1999 khân Aizâwla Chhimituipui District Council House-ah Chowkidar hna a thawk.

A tlûk sual avânga ke ruh tliakin, thang khat lian zet chu a kal thei lo va. Heti chung hian kohhran ni pawimawhah a inkhâwm hrâm thîn. Chak lohna chi hrang hrangin a tlâkbuak zêl a. August ni 14, 2025 (Ningani) khân Lêngpui Damdawi In panpui a ni a. Isolation Ward-ah dahin daktawr leh Nurse-ten theitâwp chhuaha an enkawl chungin, zân dâr 7-ah Lalpa hnênah a châwl ta a ni.

A tûk chawhma dâr 10:30-ah Rev. Lalchungnunga Hahnâr, Bialtu Pastor-in in lamah thlahna hun a hmang a. Chhûn dâr 12-ah Upa Zairemmawia, Tlawng Presbytery Moderator-in biak inah a vui a. Bial Zaipâwl leh Kohhran Zaipâwlten sùnna hla an rem a. Kohhranhoten ui takin kan thlah liam ta a ni.

*Upa J.B. Thanga
Lêngpui Kohhran Ziaktu*

**UPA H. LALMAWIA
CHAMPHAI BETHEL
(1953–2025)**



Upa H. Lalmawia (72) hi ni 22.8.1953-ah Zote khuaah a lo piang a; Upa H. Buangchhuaka leh C. Laldailovi-te fa 5 zînga an fa hming koh a ni. September 1973-ah C. Chawngpuii nêan an innei a, fa 4 an nei.

Kum 1994-ah Champhai Zote Kohhran Upa atân thlan a ni a. Hemi kum vêk hian Khawchhak Presbytery-in Champhai Bethel Kohhran Biak Inah Champhai Zote Kohhran Upa atân a nemnghet.

Eizawna avângin kum 1997 October thlaah Zote aţangin Champhai Bethel Vêngah an rawn pêm a. Kum 1998-ah Tual Upa atân thlan leh a ni a. Hemi kum vêk hian Upa atân thlan nawn a ni bawk. Kum 1999-ah Khawchhak Presbytery-in Champhai Vênglai Kohhran Biak Inah Champhai Bethel Kohhran Upa atân a puang leh ta a ni.

Tualchhûng kohhranah chan-vo chi hrang hrang a chelh tawh a, MSSU aţangin Chawimawina Diploma a dawng tawh bawk. Bialah Chairman, Secretary,

Treasurer leh Statistician a ni tawh a. Presbytery-ah Secretary a ni tawh a, Nomination leh Standing Committee-ahte a tel tawh a, a thih lai hian Standing Committee Member a ni. Synod Executive Committee-ah kum 2010–2015 chhûng a tel bawk.

Champhai Bethel Vêng VCP a ni tawh a, Champhai Joint Village Council Chairman a ni tawh bawk.

Pum lam ʈa lo (Ulcer) avângin ni 17.4.2025-ah Aizâwlah a inentîr a. Hetah hian a thin (a mît hnûn) a cancer tih hriat a ni a. Cancer daktawr lama refer a nih hnuah chemo a ei chi cycle 4 ei tûra tih a ni a. Cycle 3 a ei zawwah a taksa a chauh tâk deuh avângin a ei chhunzawm ta lo va. July ni 23–29, 2025 chhûng khân DM Hospital, Champhaiah enkawl a ni leh a. Ni 17.8.2025 (Pathianni) chawhnu dâr 2 khân Lalpa hnênah min chawhlsan ta a ni.

Atûk chawhma dâr 11:30-ah Rev. Lalhmingthanga Chhange, Bialtu Pastor-in in lamah thlahna hun a hmang a. Chawhnu dâr 1-ah Rev. Albert Lalchhanhima, Champhai North Presbytery Moderator-in biak inah a vui a. Bial Zaipâwl leh Kohhran Zaipâwlten amah sûnna hla an rem a. Kohhranhoten ui tak chungin kan thlah liam ta a ni.

*Upa H. Zairemmawia
Champhai Bethel Vêng Kohhran Ziaktu*

**UPA THANGHLEIA
PHULMAWI
(1936–2025)**



Upa Thanghleia (89) hi ni 9.7.1936 khân Tlângpui khuaah a lo piang a; Salchhûnga leh Lalngihllovi-te fapa a ni. Ni 6.5.1961 khân Roṭhuami nêñ Thingsûlthliah Kohhran Biak Inah an innei a; fa 6, tu 18 leh tuchuan 2 an nei.

Tlângpui khua aṭangin Phûlmawi khuaah anrawn pêm a. Kohhran leh khawtlângah theihtâwpa inhmang ṭhîn a ni.

Tual Upa term 5 a chelh tawh a. Kum 1999 khân Ṭawi Presbytery-in Sesawng Kohhran Biak Inah Phûlmawi Kohhran Upa atân a nemnghet.

Tualchhûng kohhranah chanvo chi hrang hrang a chelh tawh a. Bialah Nomination, Standing leh Sunday School Committee-ah a tel tawh a. Presbytery-ah Standing Committee-ah a tel tawh bawk.

Amah hi mi zaidam, inthlahrung leh tlâwmngai tak leh kawm nuam tak a ni a. A bawk-

sawp hma, kal ṭha hlei thei lova a awm lai pawhin kohhran thil tih leh inkhâwmah tel ngei ngei a tum ṭhîn. A inlêngte bulah leh a lêng chhuahnaah Pathian thu hi a sawi deuh reng ṭhîn a. A hun âwlah Bible a chhiar ṭhîn bawk.

A upat lamah alzheimer natnain a tlâkbuak a. Kum 2022 June thla vêl khân damdawi inah luhpui a ni a, ṭhat lam panin in lamah enkawl chhonzawm a ni a. A taksa lo chak lo lehin, ni 17.6.2025 khân ZMC lamah phurh thlâk a ni a. A ziaawm deuh avângin a fapa te in, College Vêng, Aizâwlah enkawl chhonzawm a ni. Ṭhat lam a pan hlei thei lo va. Alpha Hospital leh Redeem Hospital-ahte enkawl leh a ni a. Theihtâwp chhuaha enkawl a nih laiin ni 25.8.2025 (Thawṭanni) zîng dâr 7:25 khân Redeem Hospital, Aizâwlah Lalpa hnênah min chawhlsan ta a ni.

Hemi ni vêk chawhnu dâr 1:30-ah Rev. K. Lalêngmawia, Bialtu Pastor-in in lamah thlahna hun a hmang a. Tlai dâr 3-ah Upa T. Lalnlianiana, Ṭawi Presbytery Moderator-in biak inah a vui a. Bial Zai-pâwl leh Kohhran Zai-pâwlten sûnna hla an rem a. Kohhranhoten ui tak chungin kan thlah liam ta a ni.

*Upa K. Vânlalbûka
Phûlmawi Kohhran Ziaktu*

CHANCHINBU MAN PEK DAN

Hetiang hian **Kristian Tlângau** chanchinbu man pêk theih a ni:

1. SL&PB Office, Synod Office, Mission Vêng, Aizâwl, Mizoramah.
2. Dâkah Money Order hmangin a pêk theih bawk a. Hemi address-ah hian thawn tûr a ni: *The Circulation Manager*
Kristian Tlângau
Synod Office, Aizâwl – 796 001, Mizoram

3. Hetiang hian bank kaltlangin a pêk theih bawk –

- | | | |
|--------------------|---|----------------------------|
| (1) Account Holder | : | MPC SYNOD |
| Account Number | : | 10665620059 |
| Bank | : | State Bank of India |
| Branch | : | Mission Vêng |
| IFSC | : | SBIN0007058 |
| | | |
| (2) Account Holder | : | MPC SYNOD |
| Account Number | : | 25047048954 |
| Bank | : | Mizoram Rural Bank |
| Branch | : | Khatla |
| IFSC | : | SBINORRMIGB |
| | | |
| (3) Account Holder | : | MPC SYNOD |
| Account Number | : | 001101820000093 |
| Bank | : | MCAB |
| Branch | : | Centenary |
| IFSC | : | YESB0MAB007 |

Bank kaltlanga pete chuan pêk veleh pêkna receipt/message chu screenshot-a, agent hming leh address nêh a hnuai a hming leh phone number târ lanah hian WhatsApp hmangin emaw, remchâng dang hmangin emaw thawn nghâl tûr a ni:

Thawwna tûr : Pu Lalfakzuala
Phone No. : 98624 73218



(REV. P.B. ZOSAPTHARA)

Editor, SL&PB

Synod Office, Aizâwl, Mizoram

SYNOD BOOKROOM LEHKHABU THAR

Nun hahchawilna : Rev. Zaitanmawia Pachuauvin ni tin Pathian pâwlina – tleirâwl leh thalai pual a tihchhuah hi ₹200/- man a ni.

Chhûng Inkhâwm Bu : Rev. Lalrinmawia Hmâr ziah hi ₹200/- man a ni.

Kristian Hla Bu Bih Chianna : Kumin Nilai leh Beihrial Thupui bu sawi zau nâna th̄a tak tûr, V.L. Luaha Renthlei ziah, chhut nawn hi ₹650/- man a ni.

Heidelberg Catechism : Kohhran zirtîrna dik leh th̄a puan chhuahna lehkhabu, F. Lalremsiama lehlin hi ₹300/- man a ni.

Ka lâwm e Lalpa : Rinna leh khawsak kawnga kan mamawh hrang hrang, P.C. Lalbiaktluanga ziah chu a lo chhuak ta. A man ₹300/-

Nunna Chaw Bu 3-na (Chhûng inkhâwm bu) : Pastor Bena ziah chhûng inkhâwm bu hi ₹200/- man a ni.

Buaipui tham Isua : R. Vânlalzauvan an chhûngkaw dinhmun leh chanchin aţanga Isua hi buaipui tham a lo nihzia a ziahna bu hi ₹350/- man a ni.

History of Astronomy of the Mizo People : Kan Mizo piputen an thil chhinchhiah leh hriatte chhui zuina leh dah th̄atna, tûnlai mila sawi fiahna nêna dah khâwmna, Lalrinkimi, Lalthakimi Zadêng leh Martin George-te ziah chu a lo chhuak ta. A man ₹600/-

Shendu Lakher Chanchin : Shendu/Lakher/Mara-te chanchin chhui zauna lehkhabu th̄a zet mai chu James Miahlung chuan a rawn chhuah e. A man ₹350/-

Hmeithai Leikhathawn : TV presenter lâr, Janis Hnamtein a thil tawn aţanga mi dang t̄ana ţangkai tûr a ziah hi ₹200/- man a ni.

Hrisêlna Huang Vol. 2 : Jerry Lalduhzuala, Registered Pharmacist-in hrisêlna kawnga kan mamawh a ziahna bu hi ₹250/- man a ni.


JF-A tak kha aw : J.F. Laldailova kum 100-na puala a sûlhnu chhui zauna leh a chanchin kimchang ziahna bu hi ₹350/- man a ni.

Mizo Folk Song zir zauna : Mizo hnam zai chi hrang hrang chhui zauna lehkhabu, Archive Committee, Govt Hrângbana College chhuah hi ₹150/- man a ni.


Sik ni eng Zikpuii Pa hlate zir zauna : Zikpuii pa hla chhui zauna thuziak intihsiaa a tiţha zualte thu ziah bâkah a hla zir chianna seminar-a thuziakte dahna lehkhabu, Department of Mizo, Govt Hrângbana College chhuah hi ₹200/- man a ni.

Zikpuii Pa Kawtchhuah : Zikpuii Pa thawnthu chhui zauna thu ziak intihsiaa a tiţha zualte thu ziak bâkah a hla zir chianna seminar-a thuziakte dahna lehkhabu, Department of Mizo, Govt Hrângbana College chhuah hi ₹200/- man a ni.


To



Isua a tel ve : K.T.P., Ramhlun Vêngthlang Branch chuan an Branch kum 25-na pualin Mizo mi lâh leh hriat hlawh tak tak mi 12-ten an nuna Lal Isua tel ve dân an ziahna lehkhabu ða êm êm mai chu an tichhuak a. Fuihna thu ða tak tak, hring nun zin kawng zawhpui tûra Isua lo thlanawmzia lanna lehkhabu a ni. A man ₹150/-



Theologian ropuite leh an zirtirna tlangpui : Kohran hmasa hun aţanga ţanin, theologian ropui tak tak mi 40 chanchin leh an zirtirna tlangpui ziahna, an hun lai ðeuhva mi fing leh mi thiamten ngaihuahna fim leh ril tak hmanga Pathian thu leh Kristiante rinna chungchâng an hrih fiah dân ngaihnamw tak ziahna lehkhabu, Fellowship of Mizo Theologians-in a chhuah hi ₹200/- man a ni.



A lai taka mihring (Mahni inpathian) : Article hrang hrang, ngaihnamw leh bengvârthlâk tak tak, nun kaihruaia fuihtu ða tak ni thei thu ða tak tak dah khâwmna lehkhabu, Lalngakmawia Khlangte ziah hi ₹200/- man a ni e.

Published by Rev. P.B. Zosâpthara at Aizâwl, Mizoram on behalf of MIZORAM PRESBYTERIAN CHURCH. Typeset by SL&PB and Printed at the Synod Press, Aizâwl - 796 001, Mizoram.

Copies - 46,000